

贈東類彙卷

行狀

總管丁公行狀

公諱顯祖字

汝族宋通之

河東澤潞

大志燕趙

官屬居彼

聞太祖皇帝

先卒次節總

公追念先志不無和日激厲力學勤苦教於政事聽斷明察如
 憲宗皇帝出征軍次鉅鹿時世
 實從與節副公有舊所公
 顏喜說酌酒賜之謂太保曰
 公人也王氏為高平
 其處子辰之亂起
 定生明字光雅幼有
 龍州人奉為節度判
 邢人擢州官出迎表
 年歲於位明陞子長
 邢州節度判官戊申

牆東類彙卷十四

行狀

總管王公行狀

公諱顯祖字繼先姓王氏其先澤州之高平縣人也王氏爲高平望族宋遼之間簪紱不絕女真有中原或仕或處壬辰之亂盜起河東澤潞孤危祖定避地於邢臺因而家焉定生明字光庭幼有大志燕趙豪傑悉與交結金遷汴梁河北隔絕州人奉爲節度判官幽居被圍天兵南下太師國王徇地至邢邢人擁州官出迎奏聞太祖皇帝賜明金符升本州節度副使明年薨於位明四子長先卒次卽總管公公生庚子九歲襲父職爲邢州節度判官戊申歲也公追念志不就痛自激勵力學勤苦敏於政事聽斷明審如老成人己未冬憲宗皇帝出征軍次鉅鹿時世祖皇帝龍潛護駕太保劉文貞公實從與節副公有舊引公入見公年十四狀貌屹然有奇偉氣天顏喜說酌酒賜之謂太保曰此兒不凡汝其子之

中統三年邢改順德府公爲府判官如故始受宣命會山東李賈
叛據濟南河朔震動公隨大軍往討先登陷陣李迄就誅公不言
功調衛州判官衛與邢相聞熟公治行不合而化至元四年調汴
梁路同知鄭州事鄭土狹民貧公撫卹有方鄭人德之七年調宣
德府判官秩滿同知濱州事公進不求名不喜結勢援連爲州佐
貳泊如也十二年江南初附維揚久圍不下主帥檄公領所部濟
師城旣降公復歸濱兩考終代者不至遂棄職而去居邢三年復
起爲同知德州事尋除汴梁路鈞州尹在任六年威惠旁行陽翟
故無廟學剏□一切招師取友勸學興化會州境大旱公露禱輒
應甘雨驟降田苗勃興士民各爲立碑紀其事二十七年丁母夫
人憂時服制未定公首行三年喪解官廬墓二十八年服闋行省
平章約蘇穆爾以貪刻失民心湖廣騷然世祖震怒命順德忠獻
王達爾罕往按之除公行省副理問窮治黨與次第誅殛追賊以
鉅萬計民大說官庫被盜不獲訊及平民株連甚眾公推問得實

乃守庫兵自盜賊證明顯遂伏辜其無辜在縲絏者百餘家盡釋
之皆喜舞羅拜而去三十一年行省委公整治湖南等七路錢糧
蠲無名雜科之賦除有徵無納之額至今民間便之元貞元年改
差濱州州尹公去濱二十有一年矣父老聞公復來夾道懽迎公
究悉一州利害知百姓苦食貴鹽申請所司今後先散鹽而後支
價較之常年可省民錢一萬二千餘錠官亦無不利焉從之州人
受賜刻石頌德時山東鹽法壞亂民大擾朝廷以公才堪繁劇就
俾整治選除山東東路同知都轉運鹽使司事首尾六載增鹽引
一十四萬有奇商賈通行公私兩濟大德九年自山東回除少中
大夫江西袁州路總管公慨然曰吾自束髮出仕至於白首險阻
艱難備嘗之矣賴先人遺澤幸得不墜今吾老矣日迫西山尚夜
行不止耶力辭不赴任十一年公年六十七請致仕不報五月某
日薨於私第之正寢公父子有德於邢邢人聞公之喪如悲親戚
公性沈毅度量開豁騎射冠一時好古博雅善屬文結交當世名

士如易濟趙公肯堂王公秋澗盧公疏齋李公受益陳公吉甫張公孟符郭公百川劉公端甫董公朴皆深知公者碑陰先友不可勝載卜以某年某月某日葬於某州某縣某山之原公娶同郡張氏夫人先公二年卒繼室范氏夫人後公九年卒子四人長曰郁襲父爵授忠翊校尉同知州事曰山曰允曰信山早夭女三人曰璋適侯某曰英適侯某曰娃適李某孫四人曰祐曰延曰煚曰寧皆長出校尉君再任江陰州判官挺挺有父風一日泣告余曰余不久早孤失業唯是先考君筮仕五十八年歷任一十有六不爲不久嘉謀善政不爲不多家乘散軼弗錄不孝是懼今僅哀輯一
二大略敬以授子子爲我狀其事余辭有二難焉南北異疆隔絕久所傳聞異辭一難也先太師鴻名盛烈宜牒考功請謚牒史館編錄皆於狀取信必得當世鉅筆以發揮潛光顧衰老淺陋弗稱是二難也君曰毋庸吾屬之子矣不獲已乃撰具歷官行事次第登諸冊以授使者有司采擇焉謹狀

家傳

陸莊簡公家傳

代子鏞作

先公諱屋字仁仲陸氏世爲吳郡著姓常熟一枝不知始所徙入世祖諱景山遷暨之化成鄉今爲江陰人曾祖諱英才妣王氏祖諱大昌宋承直郎監慶元鮑琦鎮妣李氏考諱渙江陰軍安撫副使妣蔣氏先公資性英悟學問絕人有經世之才旣冠值乙亥丙子之難江浙寇盜蜂起安撫公招集民義捍衛鄉井公實左右之天兵南下暨當衝要公隨機應接境內帖然版授江陰軍判官事定朝京師授四品官朝列大夫同知徽州路總管府事時至元十六年也始至新安人疑其儒家子少不更事易之公畱心政事發擿奸伏人皆以爲神有訴其山鄰軼界若干丈者官驗之良是命歸之公疑焉曰吾聞揣高者以約法不以尋丈計也安知訴者不更羸乎合兩家質劑互審之果然訴者乃伏又有爭山葬者各指一冢莫知歲月遠近公視之曰必發而冢爭者曰法不許也公曰

吾故欲發之何如爭者變色公命具畚鍤爭者逸迫而視之虛冢也縣解官錢止驛舍或竊負而去莫知主名公呼在行者詰之指其一曰訊彼一訊卽伏贓具在或問何以知之公曰吾覘其容止耳官命造舟江東諸郡集昇之龍灣公白宣慰司歛居萬山中道遠莫能致請就太白渡便從之役中止又欲運材之良者赴北公又持不可未幾宣之旌德卒以募民徙木召亂至調軍招捕乃定公在郡四年始代人追思之二十五年授朝請大夫江東宣慰副使時權奸秉國罔利析秋毫符檄旁午公據義力爭度不勝遂謁告去二十六年改除江南浙江道提刑按察副使浙西人物浩穰土俗浮侈公風裁清高剛腸疾惡一繩之以法無所迴避海運萬戶之子緣私逋久繫編民公捕而笞之州縣吏坐侵漁百姓者劾去數十人追贓以數萬計單車所至貪饕側目豪右斂迹最後分司杭州杭故都尤號繁劇難理是歲饑詔發廩粟十餘萬振之公親監視給散人蒙實惠郡侯及通守挾威恣橫公廉得賣鹽鬻獄

等事捕繫其人各官稱疾不出公操之益急申行御史臺停其職時權奸旣殛奉御帥行省官兩監察御史就故太常寺趣詔獄窮治其黨與籍其家貲差委紛然通守因求自效竄名寺中反以飛語構公公面對白發其奸奉御以下皆是公然事浸解會織染局官以賄敗事連行省驛吏及胥典十餘人公移文右司指名取之旣至一夕款服左司不善也詠參政公謂分司不當按省吏以違制論將奏其事先使人詰公曰右司吾子也又詰右司左丞公獨曰分司不得按省吏固也吏果受賂御史亦不得問耶乃以成款上御史府營救者甚眾御史迫清議具獄已成不得變乃速決之參政及左司怒然無如之何適使者至參政以他事獲譴胥靡之而去有識相謂昊天不祐凶人矣居無何按察司罷改肅政廉訪使公以例去旣抵家乃營舊圃按行松菊建閒居堂燕喜亭歲時奉親輿逍遙娛宴堂後古梅數十株苔幹槎牙築臺其上本心文公書其扁曰天與清香日與賓客吟嘯樂飲若與世相忘者久之

州集一四
起除中順大夫同知台州路總管府事入境聞簫鼓聲訝之乃郡人聚眾立社以迎鬼神者殆數千人公杖其爲首者梟諸木偶投諸江人大驚視事未幾閱牘有未具者悉釐正之罪人有淹禁者立理出之州長官束手受成然以其清直弗敢較在郡六十餘日以元貞元年改江東建康道肅政廉訪副使公治辨有聲故省臺交薦爭用之公益感激自奮風采愈峻部使者因市紅藍受賈人金公首劾之有奉特旨造浮屠像者威脇官吏攫取金帛逾五萬錠公又劾之其他糾彈甚眾人多怨者值檢覆諸縣水災檄一令與俱令實病不言扶曳上道邂逅身殞怨家挾其子訴謂公實死之公不自辨用事者將中以危法公不知也在鄱陽日思太夫人年高陳情歸養士民泣送舟過湖口行省使者將命逮公不知公在也風帆迅駛交失之暨入城公已去使者曰余知其無罪也而用事者遣余天相之矣以追不及返命使者獲罪公不還家徑北入都詣臺自理臺中人皆知其無辜畏用事者莫敢言會國有

大需乃得釋尋降三官授朝列大夫嶺北湖南道肅政廉訪副使公辭不可不得已就道湘楚去京師遠蠻獠雜居人不知法俗尙競渡歲多溺死峒丁盜牛畜因相鬪訟公皆厲其禁警捕官捕盜拒捕格殺而取其首盜反誣以故殺久繫獄公問釋之里婦獨居夫不在僧出入其家或誣以與婦謀殺其夫指道旁尸爲驗僧不任答乃誣服囚之六年公閱其牘尸死以夏月猶衣冬服疑之根問得實乃何人先數月受杖而踣於道者非夫也破僧械畱園中公歸之明年吏有部送征蠻糧過湖北者見其夫實存與之歸僧乃免公所至平反非一事此其尤著者也長沙部十郡公按行其九所至宣明風化敦孝行禁淫祀爲首溪翁山獠駢首聚觀至今談公名者以手加額先是宣慰副使某受賂覺誘罪其下許代之償既而靳之無贓可徵其下自言公闕實卒正主罪先是行省欲削風憲之權請自今有罪者分司與民官居廳審問然後結正迨同審輒翻異公患之及宣慰副使敗公以爲言御史臺奏聞有旨

革去新例廉訪使復正其體自公始公固倦遊又以侍親棄官歸
逾年升中議大夫海南廣東肅政廉訪使嶺南有討叛積功至大
官者貲累鉅萬奸賊狼籍民重足立不敢言臺憲纔一舉按輒反
噬至是事發御史置獄維揚逮者相望某官崛起不敢出嶺公至
行臺稟方略人爲公危之公曰是何敢然吾杖國法驅之耳船至
番禺遙望有盛服罄折俟水濱者偵視之曰某官也公使辭焉至
駟請見又辭視事之日某官來賀升階請受事公辭曰均王官也
不相統攝請毋勤姑歸治行明日訴某官者至公視其牒皆譎詞
卻之不受又明日訴者沓至如前復卻不受某官喜曰公不害我
矣蓋前告者皆某官遣爲之以嘗公公識其情置不問乃肯就逮
北出英德百姓覘其去始稍稍出自言敢吐其冤公按問得非法
事數十條絡繹呈臺某官聞之嘆曰吾他日復得南歸若種當無
復遺其暴如此御史問未竟索其獄赴都尋赦不誅人以爲恨公
在廣南修古廉吏祠免儒籍差役增贍學地租請復恩館田賜北

客之死南荒而妻子不能返者請留船貨在州市易免擔夫跋運
之勞請禁官吏詭名行鹽奪估客之利者爲政期年復以侍親棄
官歸公自初筮仕凡七拜宣命四握憲節持身廉介遇事果斷洗
冤澤物興利除害不可殫舉性至孝居家侍太夫人旦夕不離左
右親嘗甘旨三仕皆以就養去職諸子纔勝衣者即使就學招明
師訓之身自程督嚴甚治家整而有法內言不出於榻外言不入
於榻家人十指廩給稱事喪祭一用朱子家禮不詔鬼神不佞老
佛扁所居齋曰義嘗曰吾平生受用義字不盡待宗族尤有恩捐
私租做范文正立義莊法計口而散之婚嫁喪葬皆有助農隙則
聚里中子弟設塾而教之患差役不均爲之區畫先所居化成一
鄉始立式推排除詭寄虛椿之弊分戶九等各出助田若干以身
爲率先後差次每歲以三兩戶應充里正主首卽以義粟與之收
斂破除皆有籍輪一人掌之歲終會其成約數年後義粟有羨乃
以置良田如義田之數以所助田還其主行之二十年鄉民享其

利皆讓不爭守其法至今不變他鄉以役破產者多矣皆追思之而莫能繼之者凶歲發積散財糜粥以飼餓夫不足則貸諸姻家以續之故家無餘畜佃僕周急樂施不倦豁然也與人商論不能屈摺皆鑿鑿實語不相褻狎亦不可干以私公家居官府不敢爲不善事有疑輒質於公公亦檢制下人不以一毫擾官府閭黨有爭多不詣州縣來取決焉公平心剖其曲直勸之以善皆說服而去尤愛敬士類迎門倒屣討論經史娓娓不倦作詩學少陵詞喜稼軒下筆往往逼真在五羊任所得瘴熱疾醫投以附子乃愈洎出嶺精神稍減於前踰年舊恙復作不敢復以烈劑繼之寢疾數日而歿弔者皆哭失聲識與不識皆歎息曰善人無所恃小人無所忌矣公生寶祐六年戊午之九月薨於大德十有一年丁未之六月享年僅五十是歲九月葬於州之寶池鄉定山之麓延祐五年覃恩贈嘉議大夫上輕車都尉吳興郡侯諡莊簡公初娶江陰縣丞趙公慶胄之女早卒繼娶昭勇大將軍廣州招討使湯公忠

信之女俱吳興郡夫人子男七人曰鏞鏜銓鎰鑄鉉錡女幾人孫男幾人女幾人初鏞與先人昆弟也先大父安撫公棄世時鏞尚幼先公未有子大父謂之曰以是爲而子善視之故先公愛鏞特甚不啻自己出嘗曰吾非利其財異日當以田產半與之先公既歿鏞次當襲爵讓與弟鏜又以所居大第讓與諸弟而出居屋之西偏於是湯夫人畀鏞以先疇之半遵治命也鏜今爲承務郎湖州德清縣尹銓爲登仕佐郎規運提點所大使餘未仕先公之葬也速故不及請銘于當代名士日月逾邁往來於懷姑述梗槩藏諸家乘以俟太史采擇

祭文

祭運糧陳總管文二首

嗚呼一貴一賤交情乃見通家子弟異邦姻眷一死一生乃見交情談笑在耳慟哭失聲瑰奇之能卓犖之器居家而理居官而治駟車佚老牆翬華終哀榮始末世孰如公胡不百年云何一夕聞

訃罷市行路喑喑生芻致奠匪我愆期衰疾無堪止或尼之乃塞
帷堂肅拜公像追念疇昔吾將安仰魚龍海水忽變枯桑白骨無
言寒沙茫茫朝華夕悴古今共歎沒窳牖下公復奚憾

嗚呼生死之道通乎晝夜之道辰自子以至亥人自幼以終老達
者觀之則商彭不爲壽魯顏不爲夭蓋福祿之易求而身名之難
保寄空榮於華屋棲餘寃於衰草長夜漫漫白日杲杲百年鼎鼎
萬古浩浩如公學問之素充才器之獨抱負萬斛之舟而自任者
重養千金之軀而不銷其寶蓋其胸中所得已多彼蟪蛄青松是
區區者俱無足道某之所恨前哲之日凋而典刑之莫考念通家
之契闊空臨穴而哀悼死者有知觴爲予醕

祭袁國華文

嗚呼哀哉生死有數聚散無端中身之壽行矣樹檀同心之友傷
哉刈蘭憶凌雲之雅操懷竟日之清歡得句花落銜杯月殘止客
投轄倩人整冠置駟慕鄭命車奉驪提博局以爭長擲布袍而戲

謾或掣牀而怒弼或賭囊而負安抱雋才而莫試聊放迹以自寬
奈黃梁之未熟驚落枕於邯鄲自悼亡之戚戚鬚中白其似潘末
疾浸淫尊足蹒跚遂放柳枝凭几靜觀一夕昏霧入人鼻酸君乘
葉舟冒此奇寒正脈中虛厲氣外干扁盧束手藥盡技殫棄白日
之旦旦卽厚夜之漫漫嗚呼哀哉某等交如金石語出肺肝死生
契闊況也永歎薄言往奠一慟撫棺傾淚填膺書此血丹

代祭朱南伯文

嗚呼巨卿元伯之約素車白馬之馳載在史漢人以為疑要之朋
友之義垂死不變而精氣游魂之感理或有之嗚呼友誼且然而
況於親戚之悲乎君之妙齡問學最優諸老避之皆遜一頭嗟予
生晚又不及諸老之門唯視君爲前修君既忘年辱與之游而三
星束楚方結好於綢繆昔歲在蛇君疾弗瘳我登寢門竟日遲留
握手別去遂往南州聞訃旅中涕泗滂流梧桐再華歲籥已周君
歸玄宅青松一邱祖道持觴君能飲不

祭趙一山文

代其子作

嗚呼哀哉吾父生平竟有何樂宦途齟齬家事蕭索淒其老懷寄此清酌忘形一醉適興自然嬉笑怒罵白眼青天中山千日屢呼不醒豈期一夕無言長暝嗚呼哀哉祖母年髦弟妹童幼不肖何怙號天莫救日吉良辰輻車啟行薄暮一奠血淚如傾事死如生情敢不厚哀哀我父能復飲否

代祭叔父文

嗚呼叔父壽七十餘不爲無年子又生孫不爲無傳繙經閱古畜學不爲不富杜門埽軌抗節不爲不堅所可痛者宗族無睦姻任恤之老鄉閭失仁厚忠信之賢攷叔父之生平感世事之輪雲俄千金之易散惟一瓢之獨存雖室人之交謫公談笑如不聞豈小智之可窺信大雅之不羣今茲已矣空復何云某等幼蒙教育頭已白紛追念疇昔幽明遽分輶車祖奠漠漠營魂血淚落俎言不能文

代祭南坡文

原注甥祭舅

嗚呼我先君子講授於鄉舅氏從遊入室升堂實以伯姊來嬪于楊婚姻之重師友之良百年相好一日可忘遭家不造孤在新喪舅氏獨存魯殿靈光我見舅氏我心悲傷如母存焉感詩渭陽今其既亡使我涕滂嗚呼哀哉如公心平而直氣和而剛稟質之渾厚操履之端方宜乎善積而慶壽永而昌義氣聚一家之樂文字發諸孫之祥天之報公八十之年不爲天人之望公千歲之日不爲長奈自非比於金石安能保於無疆嗚呼哀哉公之將殆易華皖於正寢屏粉黛於洞房自志墓銘生求挽章哀怨盡消於淮海曠遠尤過乎柴桑挽古道以自期豈今人之可望某所痛者喬松已老凋零繁霜弱羽無依中野徬徨懷舅甥之繾綣隔生死於蒼黃滴茲血淚來奠一觴同心盟在白水茫茫

代哭外舅杜威州文

某昔官於公之鄉乃識公見其容貌恂恂服用簡質夷考其行其

鄉之人曰如其服若容訪其親知則皆賢士大夫也余心降焉而未得交也後數年取公之長女公不我棄遠道送將暨余于居凡三日穀敷衽論心情義款篤始至如平生且別戒其子曰往之汝家善事爾長相爾夫子其恭儉是務既去則又數以書來會期我乎暮之春要我乎其家其悃悞無華亦如其服若容余將撰日月以婦邁乃季春之四日致土之毛遣人問無恙未三十里而反公之家隸遇諸塗來訃公喪矣致書之日而公死之明日矣踉蹌挈婦晝夜倍道行百八十里逮至而不及馮其棺矣余外姑以公之二子衰而逆我矣吁嗟天乎爲善者果不必報乎報而固若此乎三十年州縣以考進階階不過外郎以資授任任不過二千石今日藩臣以威州奏可而明月公寢疾病以死天胡奪之亟乎循公迪彝不事矯競不見知於世固也而蒼蒼者未知之乎善類惋嗟里閭驚愕而况余舅甥之至情乎薄奠不腆公乎其尚能飲余酒如疇昔將爾子以過余之日乎

代弟姪甥祭亡者文

先君鍾慶一女三子季弟先亡唯兄是恃兄之才德妙年挺出孝於事親友於弟姪舅甥之情尤親而密意團欒于晚歲舞共樂於斑衣胡傾逝於一朝空物是而人非嗚呼夜雨之牀猶疑對話白水之誓無復同心棄杲日之耿耿卽厚夜之沈沈命也奈何天乎無辜帷堂泣鶴髮之母望室抱雛嬰之孤某等親親之義生死不忘有淚如傾敬奠一觴

代人祭王郎文

嗚呼才子王勃舟次南昌詠落霞與秋水弔陳迹于滕王知閻公之得婚殊不讓於子章奈陰幣之雖焚嗟宿債之未償豈行儉之先見偶墜舟於海洋嗚呼人事悠悠天理茫茫彼愚而壽此哲而亡予牖下之季女萱草凋於北堂求君子以偕老嘉坦腹於東牀差穀且於鴻雁期桃夭於春陽忽東野之馬逸欲濟川而無梁痛逝者之如是慨予懷之永傷嗚呼白日冥冥碧水泱泱結桂爲旗

芙蓉爲裳乘雲上下與波翱翔儼雀屏其改素昏玉鏡而無光予
女身未得以奉箕箒之役義不得以薦蘋藻之芳生芻一束予子
是將敬酌馮夷共此一觴

代祭懷德巖長老文

嗚呼佛法本空來無一物去亦無一物隻履翩翩行彼西方日沒
處乃沒我等大眾不了生死猶此枯骨愛緣心生禮緣情起不恁
麼得桑下三宿猶自戀著況同居一室運水搬柴諸妙用喫盡師
氣力茶毘煙裏光明現成佛不成佛

祭袁國華母文

嗚呼昔者孟母其居三遷有子如軻遂爲大賢軻之喪母也後喪
父也先所以棺槨衣衾之美貧富不同後踰於前惟靈淑懿之資
慈儉之性不可得而見焉然積善餘慶素鍾於天故身沒之後子
孫百祿如瓜瓞之縣縣春秋享奠牖下之履幾滿而帷堂之殯弗
克舉者二十餘年豈陽陰之避忌或時月之拘牽今者協禎祥於

龜卜啟吉兆於牛眠爰停車於中野永瘞玉於黃泉某等鄉邦子
弟獲締姻連薄觴一奠生死怛然瀧岡宿草方表新阡

祭袁國華妻文

惟靈游宦從夫於蘇於杭春花亭秋月房聚散有期哀樂無
常百年偕老一夕云亡昔日辭家羅襦下堂人今不見丹旄回鄉
嗚呼哀哉續絃無膠返魂無香賢哉伯鸞失此孟光西風流水不
哭神傷靈兮來歸歆此一觴寒花浙漑曉月微茫嗚呼哀哉

代祭孺人湯氏文三首

惟靈生自儒家嬪於名族姆傳婉婉閨門雍肅采葛歸寧之意樂
舉案齊眉之義篤子策駿以游宦孫垂髫而習讀期六珈之偕老
享五鼎之厚福夫何藁砧先逝帷堂遂哭未終日月之制復值風
木之酷驚疑甫定憂患相續嗟百齡其未艾遽一夕之不淑某等
同里婚聯通家姻睦痛死別之傷懷想音容而在目薄言雞絮一
奠江曲

鳴呼哀哉生存華屋零落山邱古人同悲今此其尤藁砧之喪相繼於中壺同穴之義尤慘於柏舟舉帷堂而重帛不歲籥之再周某幼而同里長也依劉受上牀之獨拜陪東閣之英游晚締婚于仲氏託松蘿之綢繆云胡一夕闕此千秋嗚呼哀哉年光過隙人世浮漚感念疇昔我心百憂隔州之山鬱鬱松楸殯宮雙奠淚灑江流

嗚呼哀哉先君之喪靈几未終女兒之卒血淚沾胷天乎何罪降此鞠凶惟靈體閨中之秀有林下之風溫柔良善貞靜懿恭幼鍾愛於家君長擇配於華宗教子之嚴斷機於孟母事夫之敬舉案于梁鴻意百年之偕老何一夕而俱空匪桃夭之家宜乃大車之穴同嗚呼哀哉手足之情抱恨無窮舅甥之義敢不盡忠冀死者之有知俾降心以相從此言可質白石青松

代夫祭妻文

嗚呼哀哉夫妻之義著在三綱死生孔懷不言神傷昔君來嬪逮

事姑嫜孝養無違迄於終喪手鞠二雛訓以詞章長也不淑季也在旁女歸寧家徹饋下堂意其晚節享壽而康豈性太慧故命弗長嗚呼哀哉君疾甚危醫庸弗詳始於憂勞七情內戕乘以驚疑至於膏肓回生無丹返魂無香嗚呼哀哉舍西百弓水繞瀧岡汝生所命卜吉而藏輅車在野寒日無光嗚呼哀哉吾今而後撫汝子女念汝之自出眷汝姻戚如汝之未亡百年同穴此誓不忘靈其有知來歆此觴

代祭某氏文

嗚呼上壽百年止三萬六千日靈之享壽八十有九去百年而咫尺雖蓋棺而無憾終遇變而哀戚惟靈生自名家嬪於華宗溫柔良善貞修靜恭懿厥哲婦如冰如玉洵美且仁命也不淑藁砧先逝眾雛亦飛熒熒弱質靡室疇依瞻彼西方瞑目長歸某遠道言旋入門驚訃總車素幔空堂日暮寄哀一奠瀉淚如泉清酒在壺嘉實在邊魂兮來歸有風肅然

牘東類彙卷十四

牘東類彙卷十五

四言詩

題鄭子實秋溪釣雨圖

江晚漁歸鄭谷能詩未能畫也今子實乃能之耶四言八句聊戲一笑

水墨淡淡煙雨濛濛溪抱前山人倚孤篷我懷季鷹感慨秋風身

羈洛下興寄吳淞

題猿石手卷二首

空山暮雨枯木曉霜此處聞聲若為斷腸

楚山無人羣戲樹顛或據大石如君長然

五言古詩

讀史

魏延及楊儀兩人蜀俊父各懷專妒心曲直竟誰在孔明惜其才
未嘗輒偏廢渭南返旆歸師在千里外朝臣意在古魏為楊所害
楊亦不得死晚用姜維輩蜀竟以是亡束手付鄧艾艾復矜其功
受制於鍾會四人共一律皆以專妒敗家國莫不然嗚呼可為戒

李杜

子美坐同谷太白走扶風雖遭倉黃急轉覺吟詠工首亂者羣憊
貽禍及二翁因知漆室女發論乃至公觸事機難審臨危計易窮
川原愁夕照草木困西風鬼馬如龍遊鬼妾如花紅變滅不須與
焉能保其終擇禍莫若輕老遁林谷中

賦蕭仲堅所書汴梁節婦事

汴水流獨黃美人如冰清案無伯鸞夫袴無趙氏嬰姑老扶上牀
夜寒機杼鳴停梭獨太息莫把鴛鴦織織成孤飛雁離羣不再匹
河東柳家兒抉眼去其夫愚者生不諧直者死不渝太師漢復周
相國秦又楚嗟哉二丈夫愧此一嫠女

謝詹中美惠五典毓蒙書

山上有佳木春風抽新萌勿縱羊與斧條葉隨敷榮山下有流泉
涓涓滴深清勿投泥與沙支脈任縱橫物爾人亦然習與性俱成
位可望賢聖教乃始孩嬰五典敘千古一編粹羣英屬辭不厭巧

立義不厭精金玉二三子源委諸老生寒鐙讀未竟眵眼開雙明
惜哉書晚出會使世盛行價知貴洛紙報愧乏齊瓊
得己堂

爲己終成物爲人適喪己得之以爲重喪者深可恥與其乞墻生
不若蒙袂死貧賤勿失色富貴亦勿競窮達本無心安於義與命
人受命於天顏孟獨能正

性齋二首爲分湖陸提舉作

孔門性不聞學者失其義上中下爲三善與惡爲二鄒洛異而同
韓揚同而異不指理不明不兼氣不備理無智無愚氣有駁有粹
本體在涵養工夫由克治立義以居敬存誠以去僞曾思兩卷書
學問千古事性外無餘天齋中有樂地

吾宗家湖曲虛齋納天光清源瀉活水中有菡萏香我欲袖兩圖
再拜升公堂先天揭右序太極列左方見草憶春陵看花思洛陽
花草各有性指圖試參詳

怡顏亭曹若晦子無易爲奉親作

冬青有何好婆娑歲寒姿每愛淵明句獨樹乃爲奇朝陽紫翠交
夕月光陸離幽懷聊所寄宴坐輒移時陶寫得真性絲竹亦何爲
歡趣不自覺況令兒輩知

雜詩五首

田叟不知書指望升平年一生把鉏犁忽聞鑄戈鋌早晚征徭起
驚訛走相傳腐儒寒窗下風雨正齟眠
夜半正相呼巷南連巷北人語何喧喧陰風何窸窣猛虎下山來
搖尾逐不得村中雞犬盡行擇小兒食

何處人夜歸一犬穿籬吠狺狺聲四起似各應其類月寒人影空
帖耳循牆去家家防穿窬披衣不得睡

秋聲何颼颼迺在枯柳邊疇昔韻鸚鵡歲晚棲窮蟬張緒少年時
春風正可憐流光不相待白首淚潸然
定遠未封侯發憤投其筆老儒七十餘毫秃手不釋才器有長短

志趣各自適遙思玉關外萬里風沙隔

次善卿雜詩五首

貞女不自媒蛾眉爲誰掃春風吹年華閉戶綠芳草靈修不我顧
攬鏡紅顏槁焉得北堂萱聊用寬憂抱又懼青蠅讒善使黑白倒
遂令親者疏我欲畀有昊

東坡譏舉子有類候蟲鳴退之譏詩人謂作蒼蠅聲制策直而核
聯句新且清自作復自譏持論終未平無人解此意起我懷古情
蛙從井底語豹在管中見若遇大方家一笑直自獻饋漿意已驚
抱甕力殊倦因知巧若拙頗覺狂次猶玉以德保瑕珉以多故賤
火雲吐赤日旱勢千里闊古人救荒術貨食知本末家家算口賦
殆類僧持鉢激水活肆枯植木蔭道暘諸公善努力赤子正飢渴
弃兒嗝莫問瘦妻臥路傍公廩已告匱私戶猶多藏嗟哉守錢奴
竊盜勢且昌莫保千金軀汝當安得長鍊炭不及炊寶玦空自將
獨有黃巾寇不入鄭公鄉高賢古所貴薄俗今可傷

婺州傅仁贊詩求見依韻和之

髮燥始出游心期結明主天方窮畸人世不喜生語絕絃恨伯牙
抱璞泣和氏獨憐身皓皓不救俗靡靡競趨聲利途孰蹈仁義軌
實之勿復道作者敦竊比來詩鄧班馬而况孟氏婺女寶氣明箕尾德星聚
謂也雜選貢棘闈高明識芝宇衡鑑付有司尺度失奇士少需知
我者一第溷子耳瓠樛嗟無用車斗不勝數老矣何能爲歆然徒
自視安得善及人共勉學爲己

和陸振之見贈韻

我懷陶元亮早弃彭澤令盃甘柴桑餓不受宋人聘晚詩題甲子
統著義熙正得書晉徵士千載論始定吾宗佳公子世祿讓千乘
高眠九思齋清節故可敬寄來停雲篇詞與意俱勝耿耿好賢心
頗似緇衣鄭吾家未得閒歉歲講荒政良苗困螟螣兇暴過梟獍
閭里不聊生一髮寄微命閉閣憂攢眉懷哉我同姓惜無勳業志
不必頻看鏡吾衰畏殘暑一雨秋意盛拏舟沂流歸帆飽風力勁

田蕪且莫問但恨荒菊徑明月近中秋雲埽天宇淨素娥惜皓髮
把酒呼不應何當共攜手盡此南樓興效顰輒捧心拙句酬佳詠

和丁師善韻

時奉四省檄檢災

轍鮒活斗升莫向肆中索已無秋成望況復歲暮迫蓉城一小縣
舞袖折旋窄鍼芒萬畝青席卷一川白苦腸眞口蓼枵腹思啖柏
蒙袂嗟飢氓胠篋畏暴客將懷轉壑憂誰任求芻責爲政推仁心
匹婦無弗獲登途祇王命東西固不擇漢網殊闊疏挂一直漏百
但令大綱正潛使宿弊革斯民本同體難以一膜隔發奸雖有術
救急豈無策不憚原隰驅要知閭里阨消平蛇龍居安集鴻雁宅
庶免愁歎聲謠誦沸黃陌

辛卯二月記異

客子遊吳中步上姑蘇臺是日天雨土四面集全埃微明日漏出
半浪風吹開癡兒喜團沙智士疑劫灰天意復如此人事信悠哉
有感

六月南風盛秋意雖未多長養會有極搖落將如何高槐鳴哀蟬
況乃蒲與荷一老坐太息羣兒笑且歌笑歌恐未終歲月已蹉跎
春日不出

春風不著人微寒帶微和落梅枝上稀桃李園中多桃李尚爲容
青草被陵阿時至氣自應美惡同一科無聲花蝶拍有韻山鳥歌
老人閉門坐如此景物何

清明日偕趙雲壁張仲實顧伯玉張見山遊分韻得好字以百家
衣補之趙故嘉禾宰今爲學官坐中多及學校事

清明花亂開今日風日好吾得及春游相期拾瑤草城市多囂塵
客衣日杲杲何時一尊酒且試開懷抱王孫丈人行生世何用早
爲樂當及時蹉跎覺年老虛名復何益弃捐弗復道但願崇明德
藏身以爲寶

三月旦日出遊

季春已一日寒氣猶襲人齋中偷小暇陌上追餘春金華古精廬

幾劫化微塵入門何所見修竹出牆鄰迤北過崇明殿閣何嶙峋
山房閉不啟俗客來輒暝徐歸偃籐牀息我定力勻殘書了一卷
古意口酸辛山芽聊止渴起瀹石泉新

三月一日偕善之無逸遊南山桃園分韻得源字

白雲起南山隨我渡溪園園丁荷鋤去季女出應門汲泉供煮茗
埽石開清尊人靜禽聲樂春深花事繁蛾眉映修竹掩袂嬌欲言
吾親白雲外未敢訪桃源

癸卯二月仲實諸人游野外飲花下得家字

散步逐芳草小酌慰殘花土銼埜人居茜裙蠶婦家汲流澗水渾
挽樹花梢斜園童貢新蔬復邀啜杯茶我興偶然盡汝意良可嘉
申港道中

兀兀乘肩輿西風掠老鬢雲凍山色暝水寒江聲近籬根盈尺雪
晴釋纜及寸人事日相酬客路歲將盡急歸掩柴門地鑪撥餘燼
茅山道中

蜿蜒西北來土阜餘百里怪石聳巉巖勢距三峰止大峰東南傾
中峰伏龍起縣縣互不斷小峰平而峙名雖漢代立山自開闢始
我來春雨餘峰色有如喜綠鬢光可鑑櫛沐初出水縹緲三仙人
婆婆一老子情知隔凡聖頗亦達生死埋金何必問采藥聊復爾
洞乳滴丹泉手掬漱吾齒

遊崇禧觀南陽真人置酒索詩

粉牆繚而曲轉入寶珠林卷簾鑪香出竹日淨沈沈天人一代師
功行夙所欽掀髯顧我笑呼酒得細斟雲廚薦黃獨飽慰飢蟲吟
相攜鑑正室試聽玉泉琴

京口訪郭儀山出示陸丞相遺墨

寶祐丙辰榜季世尚詞章功業已衰謝氣概猶堂堂壯士死海島
尤勝死洛陽遺翰落人間姓氏透紙香甲子行一周復見文運昌
遺黎存一二往事空口茫寒鐙客窗夢飛墮礪山洋畱眼看中原
且勿悲故鄉

渡黃河舟子作難久之乃渡

四瀆水中大尋源河最長未必得漢津支機事荒唐導流始積石
以西入要荒龍門久束狹橫潰走徐梁奔流俟其定勢可一葦航
我來桃源渡渾渾流濁黃艤舟不肯濟奈此黃帽郎石瀨投千金
貞女可憐傷

宿遷道中遇雪

登車宿遷北萬頃鋪瓊田黑雲湛水光上下玻璃天六花時時飄
集我車上氈左右拍手笑翁似白鶴仙失卻翁白髯頓覺翁少年
入杭苦雪二首

雪天無晨昏尤難辨西東高低賦萬象偶爾一色同會覩日與月
終愁雨兼風居人掩關臥况乃逆旅中買薪呼斗酒鰲頰生微紅
年年西湖上梅柳得春多新正十日雪重陰壓微和皓潔混泥途
輕盈赴寒波危橋驢失腳不如坐吟哦推窗無傑句奈此玉峰何
至元重光單闕之歲春正月隴西郡太夫人介壽八十子侍郎率

其昆弟子姪內外姻族寮友賓客奉觴上壽如儀州人士相與
嘉歎爭爲歌詩詠其事而繡使紫山胡公爲之序云

斷機碎錦纈短髻翦青絲殷勤謝師友老婦得佳兒長宦客四方
鶴髮在高堂安得凌雲翼高飛至母傍春暉不得報萱草日日長
今夕知何夕門有車馬跡堂下羅鐘鼓堂上合賓客春風吹綠酒
起舞兒獻壽客問年幾何舊歲七十九此去三千年蟠桃始開
花開又結實瑤池度歲華客起再拜言遺核幸分甘小人亦有母
八十又加三核中有瓊漿飲之勝啜菽懷歸滿袖香仙霞燭幽谷
壽理伯雍同知

理侯人之父亦復兼母慈東吏如頑奴煦民猶嬰兒闔門無雜客
鈴下生蛛絲內聞讀書聲日晏忘晨炊上馬出署事坐看棠陰移
人靜報休衙閉閣方退思廷中相戒言慎勿干以私但祝公百歲
長爲良吏師公言撫字勞良吏安可爲方當上印綬自與赤松期
壽李仲明同知

新息父賈彪南陽母杜詩東吏如官奴護民如嬰兒李侯妙政術
千古同襟期高寒月半弓清粹玉一規握菜朝爲齋脫粟暮作糜
但聞讀書聲不聞兒嘍飢褚衣敝再浣櫪馬瘦莫騎今朝侯生辰
父老持酒卮廚傳寂如水不知侯所之介壽古有言此意亦復辭
獨立古梅下遙赴天仙期

庚寅臘月二十九日餞孫晉卿宿清孝里晨起呈巖隱

驅馬四十里悵然臨別情舉酒坐太息歲月空崢嶸河流日浩浩
此地幾送迎老我白板扉卿等致太平窗風吹酒醒起視天未明
小星爭餘光殘月西南傾

皆山樓分韻得坐字

無詩山不喜無樓猶自可樓上著詩人青山皆屬我得句山禽鳴
落筆山花墮翠屏招我隱欲往輒不果推窗呼與飲醉吸雲一朵
須與成五采吐出驚滿座

爲劉君符賦樂山詩

山體本至靜仁體亦如之樂者有深味魯論無費辭目玩惟自得
心契若有期逝川同一旨妙理無容窺劉公本好古雅志非好奇
諸君為著語殆類愛山詩泉石涵清思松柏媚幽姿古來山中人
此道未必知蠟屐母乃癖挂笏殆成癡獨有首陽山薇苦甘如飴
得仁即無怨千載真吾師

字

壬辰端陽後一日會潛齋以竹深畱客處荷淨納涼時分韻得淨

日透朱櫻明雨拭白蓮淨布席開清尊授簡遞新詠謀樂須及時
養拙聊適性傳聞度遼師鎧甲冒暑盛

贈劉宗道自金陵來游茅峰

君家汴水陽弔古遊秣陵秦淮映江月歷代幾廢興古人所樹立
今人愧未能嗟我搔白髮空齋對書燈邂逅接條論談笑得良朋
我如蜩與鳩睨鯤化為鵬歲晏落蓬蒿安得齊飛騰東望積金峰
春游記吾曾鶴仙遲子來丹井嗽寒冰

贈翟良甫洛人南遊

溫洛天地中父老升平年清遊盤石坐謝絳游嵩山寄梅聖俞書醒酒落花眠

邵伯溫勝地已陳迹故事空遺編銅駝泣秋雨禍機始杜鵑耆英

日凋謝嵩少無人煙懷古笑我迂慕學嗟子賢購書或千金臥榻

餘一氈低頭肯揖吏閉口不言錢情已寄邱壑足猶履山川駕言

遠尋師胡為近舍旃煌煌邵程業百世誰能傳

贈柯山夏梅月

五星配五行占法具春秋參以四時耀不知始所由經緯十二辰

一國係一州三河即豫地係宋復係周晉自居太原衛本都帝邱

借問益與并古有二國不三晉俱屬冀韓衛不見收嘗以扣日者

不語輒掉頭渠未通古今敢問儒者流氣化互生剋躔度有遲畱

因之別貴賤庶人與王侯既云命在天何以身不修經籍古格言

較此殊不侔殃慶有所積禍福皆自求理數各一家二家果孰優

論數每多驗言理或不讐忠信人爵從孟軻老於鄒仁者必有壽

牖不死伯牛殺人取印綬嬖主乘軒輜將貂續狗尾以冠加沐猴
市朝日淘淘乾坤竟悠悠璇穹列高真星月侍宸游朝裾曳明霞
從佩鳴蒼璆居然視世濁不肯分天憂以此司罪福反自招愆尤
我願叫閻闔再拜面凝旒貪淫屏月孛兇惡驅羅睺仁賢迭生旺
儉邪永休囚帝閻不可扣金鎖閉玉樓龍眠正齁睡鳥語徒喧啾
路逢柯山翁深碧明雙眸笑我地下臣何豫天上謀今夕有佳月
且共登羅浮

贈季清隱道人

虞山桓西城尚湖繞其趾青屏照玉鏡屈摺十八里傳聞漢真人
丹成飛入水到今水不腥魚鼈長而美往年山中人夜半忽驚起
神鋒閃烈電煜煜光不已平明斲山骨石函羊鏡毀土花食蒼龍
歲月不可紀玄靈啟幽祕結構此經始雲香染衣佩嵐翠襲巾履
道人方晏坐秋葉打窗紙西風送詩句吹入千巖裏收拾費工夫
遠來將舉似見叟卻忘言鑪煙生棊几徐云乘興出興盡行當止

山中有緣事比欲相料理白鶴數日飢吾今且歸耳

贈筆生楊自新

雲屋夜明寒引紙一長吁貧無食肉相頗悔身業儒晨出生謁入
被褐而長鬚穎脫殊可喜文翰定自娛自言中山徒常與陳玄俱
醉曾揮草聖閒或寫桃符最愛王逸少勉隨劉寄奴嗟生不自惜
貌澤神亦枯世多弘肇輩幸我非二蘇

贈筆生林君實

我愛古人巧造物掩前聞遐哉蒼頡氏賴此蒙將軍將軍絕地脈
乃解開人文模寫不得力制作空云云祇今千載下藝圃專策勳
貶黜毛錐子裊進中書君工拙無定在好惡有殊分老我翻墨瀋
落紙無煙雲有友來被褐倩客試書裙雙金慙報贈隻字寄殷勤
題宋學古九天玄女數自云其師鍾堯臣得之襄城柳下老翁所
授

天九積陽數玄女夫何爲廣陵亦健將乃或一用之彼術信誕謾

此遇猶希奇珍重柳下翁仙隱未可知言天以人證言數以理推
守正死不避居貞凶可移堯富與堯壽此理殆無私顏貧與顏天
此性終無虧姑慎君子術勿與老人期
別李宰

句曲一山縣東西俱百里三茅地有靈出宰多才美前有趙與謝
今有程與李李爲山東望聲價高莫比清明一古鏡冷浸玉泉裏
敏哉製錦手洗卻鳴瑟耳仁心非邀譽直道不容毀慈煦牧細民
謙撝揖多士學館盛文風講席究經旨有客東北來空齋兀書几
彈鋏笑馮驩下榻慚孺子樂雖足一瓢飽不望四簋旣爲邑之氓
是亦吾所恥飢餓欲賙之餽贖斯受已將歸重回首決去負知己
冉冉楚山雲悠悠斷江水

畱別義塾諸公

婆婆七十翁已矣將焉求麋鹿違本性一朝出林邱故園在何許
駕言東南游人才盛吳會講貫多儒流內顧衰朽質汙渠映清溝

坐有歌驪駒將貽識者羞溽暑困朱夏偃息時休休南窗小容膝
臥對紅葵榴年華不我待青鏡照白頭祇今已後死巨海吹浮漚
諸君幸少壯勸學追前修

寄申屠御史

時謝御史被誅按申屠御史名致遠字大用
以至元二十年庚子拜江南行臺監察御史

御史帝耳目監察沿隋唐臺閣迴清風筆簡凌秋霜澄清一攬轡
驅狸走豺狼賢哉故安侯廉介尤剛方閉門杜私謁上殿肅朝綱
今侯有祖風學術尤章章出擁簿書塵入薰書傳香胸襟漢石渠
人物魯靈光終然百鷲不及一鸞鳳奉國信孜孜問途何皇皇
往歲金陵轍前年古浙杭鳴犢有餘哀河水空洋洋行役山川苦
歸興桑麻長廣陵挹雄勝平山弔淒涼瘦馬乏芻櫪寒妾無帛囊
家瘠道愈肥躬瘁名逾芳昔在東都季儉佞沈忠良知幾獨子龍
絕迹棲碣梁瞻烏止誰屋亦復可憐傷

寄錄事王君玉

時管押北
人歸鄉

風沙眯行人日腳黃無光愁鷓躑古木凍雁拾餘糧荒城雞犬寂

古埃荆蒿長瘦馬兀冰塗龍塞天一方今晨發申浦何日抵漁陽
道傍轉徙氓嗁哭勢蒼黃情游散不歸信美非吾鄉錦衣雖云樂
無褐可憐傷南泝江悠悠北視天茫茫遠煩公護視雨雪上河梁
從事豈獨賢蘭言詎能忘嗟爾居者逸擁氈坐高堂且置勿復道
擊筑飲離觴

送周宣差除陝西廉訪僉事

長安人

昔人比貴官繡錦以為衣當晝與夜行故鄉歸不歸每評會稽章
不及相州記公今往三秦身是繡衣使玉衡直而平寶瑟和而清
當知九州外生此千人英南人去勿悲西人來勿喜明年當入覲
垂紳佐天子

送陸同知北上二首

浙尾帶荒江土與村俱薄吳季獨終隱楚黃亦晚錯餘子不足數
眼明見卓落綠耳初歷塊青萍新淬鏑齒少逾老心事邇存遠略
百金重氣義千里赴言諾可期功名會兼受生死託宦途入幽薊

詩句畱殿閣出佐紫陽城一麾真小卻炳燭照吏奸良劑痊民瘼

一庭秋水淨萬戶春風樂河內泣畱恂并州永思郭歸裝乍林邱

趣騎已沙漠梅花古驛寒別酒故人酌徑北道邳徐迂西趨汴洛

官闕觀盛麗山川想寥廓成皋歎楚戰砥柱窺禹鑿舊邦弔二虢

古邑辨三亳望諸墓猶存戲馬臺如昨燕趙誇蛾眉雲代珍狐貉

壯士多屠沽逸人或巖壑訪古記宜勒登高賦須作訂訛青簡在

得句錦囊著明年衣繡歸頗願聞其略鴻鵠看高翔茗枝伏燕鵲

贈言愧非顏出處其志略

淳風日已薄恩義不相維吏無得於民民顧吏有辭政化本不立

刀筆事愈卑李侯今之人而行古所為外有屠嘉直內作五倫持

鉏奸如惡草護民猶嬰兒淪河甦彼早勸粟哺爾飢從容方報政

代者俄及期庸吏推不去良吏去復思誰歎觀民風入境采吾詩

送郝仲明代歸

古之州縣吏久任各稱職任久則化行吏與民相得民或不安業

咎在吏數易代者如傳舍吏民不相識王嘉朱浮疏每讀三太息
暨城有賢佐溫良而端直爲政知大體人方飲其德瓜猶未及期
旌已催行色中州固多士此士去可惜老稚候城隅相邀臥車側
送葉仲實赴鹽門州判

我舟餘杭遊君馬薊北驟我衣素染塵君衣錦炫晝江湖著閒散
郡國需雋茂才高眞小試儒腐乃大繆鞭讓祖生先策甘之反後
送王安之無錫州判

龍峰鄰吾州赤子久乞乳或加手斲削誰肯頂摩拊有客來嘉禾
談我讀書鴨口稱王侯賢可配循吏古廉不受私謁公不畏強禦
素秋下嚴霜陽春沃膏雨澤國鱸正肥山泉茗又苦州縣徒勞人
揚歷安足數莫思金帶橫長學彩衣舞

送宋春卿之官湘陰

乾霜落丹楓潮水清且淺雅志君山高離思湘江晚利名登津要
孤介分去聲疏遠來暮彼雖嗟去思此難挽何當升臺端繡斧煩臨

遣

送顧伯玉麻陽簿

放舟清河聞及此新雨涼故人得邂逅好語傾肺腸惜哉廊廟器
漂泊落湖湘前途阻勳業末技呈詞章營營百年短皓皓萬古長
共惜天下寶得志無相忘

送陳茂卿赴興國教授

彭城陳師道三州一學官高文曾蘇敬偉節章趙歎百世有斯人
嫡孫承後山君材中梓漆壤錯榛與菅藻芹味苦淡輒當梁肉餐
莫終三釜養竟墮一甌寒榮枯數前定出處身兩難腐鼠或青冥
枳棘栖孔鸞升高足易蹶恬處寢亦安逆君散花洲西上卷雪灘
臯比第一義子佩正聚觀士方從北學音已變南冠俎豆器疑樸
詩書味轉酸何人力不變此道獨追還金谿有陸叟昔仕乾淳閒
陸曾爲興國教授

送焦君實之采石學官

江水日以逝山花日又新先吾不復少後我皆成人之子如良金
出礦以精純又如山中木始遇雷發春送子啟長途拔子升華津
青雲題柱客白髮倚閭親有志皆騰逸非才獨隱淪山林雙鬢古
井曰一生貧宇宙無窮事行藏各自身因風傳短句望月弔詞臣
送王行可赴宣城學官

閉關坐十年扣門得一士自言貧爲養非謂學優仕執手問何之
贈言聊復爾清溪生芹藻流入泮宮水先令我清心次令人潔己
太白宣城詩清溪清鑄金師範巧琢玉士習美六經懸日月顏孟
我心水色異諸水元不死君欲從之遊青鐙茅屋底相逢莫相問擾擾鼓篋子

送嚴陵邵叔忠學錄歸侍二首

薄官如秋菰冷淡不可食學官如傳舍敝漏棲不得訪君橋水東
一榻可容膝中吳多佳士三載誰與適可憐泮林鴉止醉桑黹黑
束書歸去來釣臺秋風夕
黃甲舊書生明庭推一鶚歲莫戢羽翰靜聽華亭鶴盛衰今昔異

出處老少各乃翁信奇士之子亦不惡斥鴳伏卑枝寄聲謝寥廓
送華仲實譯史入京

蒼頡何代人後乃有冰斯智者能創物此理不復疑國朝重文字
設官如經師君才實楚產北學尤恢奇冥鴻登翰音威鳳呈羽儀
青雲睨子貴皓首笑吾衰尚白玄空守飛黃勢莫追祖行遲出郭
東畎正耘耔

送吳仲寶入京

余年長汝父汝季復余從季也難爲兄文史日從容兄也實競爽
立身期亢宗可念玉雪子五月上盧龍棗榆曝西日塵土吹炎風
爾欲赴爾志安得盍爾躬有方遊可遠揚名孝乃終歸來拜嘉慶
我酌壽汝翁

送趙季舒之燕

有客東南來白馬嘶北風問客將何之舉鞭指盧龍云是漢家子
出入明光宮古宮今焉在廢堵生秋蓬

送道成北遊

從遊十載前總角君尚少相逢十載後我鬢雪爭曜修鱗縱巨壑
倦羽落荒嶠盛衰各自異巧拙更相誚義理浩無涯經綸孰知要
立身如處女被服善窈窕止令公子慕莫博千金笑

送錢君瑜歸嘉禾

海東有孤鶴玉羽青冥閒衝風揚黃塵吹落蓉城山蓉城何寥廓
山木多高寒石泉翳荒蘚飲啄常苦艱矯首復南飛涼秋生羽翰
願隨鴻鵠遊不共雞鶩餐嗟爾不羣志全身良獨難遠避鷹與鷂
近防弋與彈仙機縱不誤雲路終漫漫

送若晦南遊

天令中和春錦花柳絲織江山回淑氣車馬有行色問君今何之
白髮在高堂韞弓箛兩矢出門志四方丈夫信有志遊近不堪遠
錫穴綆冷泉館娃弔荒畹青青三吳道急雨飄客衣縱無譏小草
恐有遺當歸

送袁仲野赴毘陵

儒吏不相得共器如薰蕕儒視吏不屑吏嫉儒爲讐俗儒不知變
諛諛孔與周事叢委不理言大忤不酬嗟乎鉛槧生謝此刀筆流
安得經濟手一洗吾儕羞當路有達官鄰境逢仁侯畱情案牘閒
舉人拔其尤君抱汲古學才識推兼優肯隨雞鶩爭會偕鸞鵠遊
高風動寥廓茲土豈淹畱獨憐老知己青鐙守荒邱不堪明時用
空懷當世憂斯民付後死已矣復焉求

送黃雲心遊淞江

吾宗兩才子世亂身不免絕憐華亭鶴竟類東門犬客行困弔苦
寒日下荒坂井邑今英雄往事海濤遠

送陳公南之松江并柬山齋

我衰惜別離數日輒作惡老懷自當爾嘗恐兒輩覺君器如璠璣
似可寘臺閣莫辭簿書苦亦有宦遊樂久厭黃田魚去聽華亭鶴
亭下有高士滴露草玄學持詩道甫訊進拜復前卻問我今何如

癡頑勝如昨

古意二首送朱鶴皋

雁蕩英英雲孤鳳雲中吟風吹五色羽墮此泮水林桐花作秋枯
野桑空綠沈苦甚不致醉鴟食子何心鳳兮歸去來岐山有高岑
蓬首寒機女枉顧生光輝一登君子堂松蘿因相依茂陵喜新聘
中路忽有違願垂堂上鏡照妾心中微生死要有託悠悠空是非
出門念遠道歲晏將安歸膏沐更誰容爲君疊羅衣

送陳子高

稜稜玉壺冰瑩潔絕纖罅無人手自將寘之霜臺下海東聞鶴唳
清思方在野遲明有公事怱怱催上馬

送吳寬齋并謝惠詩

衰年八十一草露骨垂朽有客款荆扉甘言許吾壽假如活百歲
祇欠十有九辛勤拋書冊散誕耽棋酒時時課小詩不自覺妍醜
袖中出新句見客驚欲走反顧仍疾讀佳處輒肯首呼兒急傳觴

晚喜得此友久之來告別秋懷挂衰柳百金無所贈五言聊藉手
送天台陳審中

陳爲台望族不數謝與錢此以科甲貴彼以婚姻連吾猶及乃祖
執鞭慕先賢亂後識嚴君握手吾同年事功竟落落世慮日日煎
衣冠一不振抱恨埋重泉君如丹鳳雛五采何翩翩久客滄江上
窮愁思浩然文運今再明六甲一周天老我終白屋看子收青氈
浙水東西流北風送南船赤城幾日到雁影夕陽邊

送楊伯可

齊魯多平原江淞田高下戢戢如魚鱗土籍誰主者富人擅其利
失業憫孤寡方今用周禮天官出經野古法雖可行必得奉行者
楊君古循良暨陽小民社原隰遍咨詢辭色每寬假經營始不擾
期集乃多暇實惠甦困窮先聲走豪霸隴牛閒臥晝邑犬不驚夜
當年經行處愛此憩棠舍鳩工首上計列郡居其下傾城出送君
飢童控羸馬坐中有狂生出位獨難咤均爲受塵氓關市不親稼

鄉胥上下手輕重意取舍仁公力救弊立法宜少借聖朝天廣大
馬用究纖罅議政罪甘誅矧避官長罵

送張仲實

持斧上東山伐木鳥羣呼道義不相敦朋友良可無嗟我聚糠粃
從君味膏腴方轡蹈先軌聯綬趨正途事功明遠志詩翰亦小娛
但令交久長不恨別須臾歲律陰崢嶸客程路盤紆人事况寡懽
月異時復殊疏梅憶孤嶼新柳懷清湖

送師本竹

魯國幾男子陋巷稱顏淵簞食何從出賴有負郭田養志本無求
求人志可憐蜀翁古奇士束書裹寒氈客來擁氈坐客去挾書眠
索供廣文飯催送司業錢玉瓶何處酒翠釜誰家煙我乃遭數奇
彼胡鍾美偏厄窮不自憫靜退猶爲賢揖士撤講席呼兒買歸船
後游記何日今別已高年感翁出處跡撫几心茫然握手出門去
梅雨暗江天

送徐允伯

古有淳寂鄉君與陶阮到每評伯倫頌謂勝周公誥山閒童負鍤
臺下人拾帽短鞭跨遼碣破毡眠雪窖歸來四壁立挾冊坐鄉校
悠悠泮宮水羹有芹可芼案上方醉吟室中已飢告長餅臥虛簷
破釜架空竈翠眉方與齊頰頰忽自悼愁蹋布衾裂羞折海圖倒
先生樂陶然美睡呼不覺達士多迂拙庸兒競嘲噪豈知海上鯤
姑隱霧中豹歲晚空齋人杖履辱相好百錢呼兒沽一榻爲君掃
浩興忽長歌衰意亦旁譟銜杯孤月落椎壁四鄰鬧明當遠行役
寒雨映客棹秋江蒲稗深伫子平安報

徐觀伯將遠徙海陵介吾姪來索詩徐故家兵後流落三十年長
子依許監倉客淮南因贅於海陵迎二親就養坡公謂此事今
無古或聞者也感歎之餘爲賦二首

甲與吾同生君子行一周少年各豐裕歲晚懷百憂菜地古城下
我今手鋤耨君當往海陵絕江汎漁舟駕言彼就養逝將老菟裘

哀哉隨陽雁止爲稻梁謀君看橫江隼萬里凌高秋

慈鳥昔哺雛日夜望雛長安知風雨橫故巢墮草莽鳥羽日摧積
雛飢竟何往其一止海隅雌飛鳴相向反哺若天性迎鳥致其養
我衰髮盡白兒長忽先喪贈君慈鳥篇老淚滴紙上

竹友以其季子將有遠行句余一言余與翁遊視其季猶姪也爲
之言以勵其志

我生髮未燥汝父以詩鳴憂患涉世老襟義猶崢嶸晚乃得二雛
美不減徐卿季也纔弱冠詩壇將父兵愈湜氣如虹候門識奇英
下馬呼小友相顧各自驚駭駢不受羈歷塊千里行分臺柏森森
霜氣壓百城汝遊何所挾兩字直而清銳進年倍壯靜退事飽更
欲令從雅操端肯迂修程遠遊重垂戒顯親須揚名但酬化鷓志
足慰舐犢情

余先秀崇德人大父以上數世皆葬青鎮與習上人有香火緣己
已歲上人訪先子于暨陽嗣孫信講師實侍杖履余兒時侍側

髮鬚記其鬚眉兵火後絕不相聞丙申歲師來自密印問訊邱
壠無恙而上人塔松長數十尺矣己巳距丙申二十有八年如
隔一世余與師白髮相對舉似舊話感慨久之師爲畱數日將
行索詩爲別師號古民性淳質不茹葷飲酒博極羣書講說亶
亶不倦信而好古方外之逸民也

達士脫名檢高人落林邱體性未應殊作用終不侔講師得三昧
宗學貫九流曾對樹說法解使石點頭劫火焚地水慈雲護松楸
報恩心種種閱古事悠悠香火三生願因緣再世遊文辭重柳請
衣服許韓畱殷勤翻短褐博雅愧前修

題質夫竹居

西園一叢竹歲久枝幹繁會見鸞鳳棲莫壓鳥雀喧玉聲寒雨碎
翠色朝煙昏蕭蕭黃素葉風吹擁籬根主人避俗客青苔坐柴門
勁節諒無比幽懷不可言

跋徐知事所藏禊帖

徐山陰人

辨才將九十及見開皇初不知虞褚輩得似老僧書尤物世希有
昭陵劫灰餘玉函人不見繭紙乃蠹魚梅花一片石猶自寶璠璣
定武久荆棘長安復邱墟茂林有陳迹今誰山陰居

題沈華父送行詩卷

乙卯九月

孟陽索吾錦景純奪吾筆老我歎才盡秀句吐不出東陽有行卷
展玩已盈帙乘雁豈爲多買菜復求益嗟君乃佳吏家世本經術
一從冠惠文不肯事佔畢貞廉齧苦蘗和勁調玉瑟簿書謝囂塵
車馬動行色君如擊水鷗我似退風鷁出處兩忘言黃花秋浙瀝
題月心詩卷併記遇仙事云

東軒記待月縱筆說性命豈惟不知月實亦不知性文雖歐蘇工
理至關洛定人心如明月塵垢失清淨霧收海氣澄天迴風力勁
持我光明珠照此大圓鏡鏡中雙綵鸞翔立請驂乘御宴影娥池
神颿忽吹醒鸞飛曉鏡空龍睡淵珠靜依舊碧潭心無復瓊樓興
韓郎固有言仙人來賢聖

題百雁圖

青天一張紙羣雁飛來遠秋渚蘆蕭蕭徘徊下清淺若烹不能噉
一一俱不免

詠風

好風何處來天籟出眾竅披襟懷楚臺擊筑思高廟扶搖九萬里
自謂一息到安知大鵬運不滿斥鷃笑終當謝蓬蒿振翼絕海嶠
夏雨

仲夏井泉溢雨聲集虛堂銀燭瀉高簷靜聽何浪浪蓮葉不受水
盤水走低昂溽潤逼衣篝縫我新葛裳媿彼作田人簞笠排青秧
出戶懶著屐埽地燒木香白晝生睡思徐徐到羲皇夢覺聞鼓吹
草蛙怒方塘竹尾起寒煙溼螢度微光鄰翁閉門臥中夕嗁蒼黃
三日絕薪買積潦勢積牆

秋感

遙夜百感集白露下空庭秋風入草木眾葉會飄零甘液始潤物

履霜漸陰凝哀哉石柳樹讖語成添丁蘭艾既同焚孰別臭與馨
皇天默不語今古常青青

月

青天一片玉上有眾星列夜中光漸小讓此玻璃月白兔卯時生
桂子秋後結天上有山河兩翼隔吳越何當御嫦娥萬里駕飛轍
太白爲前驅綵鸞相繼發

徐德文索雪岡詩云已得而復失余尋舊橐亦無見想滕六遣六
丁取之去矣再賦一首

雪飛不擇地因高勢易積玉龍二百丈橫臥前山脊隨香去尋梅
路白無行迹鐵笛吹一聲驚裂蒼崖石

新移瑞香不得雨有歎

瑞香兒女花豔潔而芳妍得之古精廬移置列檻前易地費人力
不出花自然深慮本先撥枝葉隨之顛是時夏久旱不雨龜拆田
林木且憂枯弱植豈自全既已厄於人况復遭此天天與人讐之

命也花自憐井筒灌朝夕小潤培芳年封植豈無心榮枯自有緣
何時回春風笑挽司花仙攜手共尊酒醉臥雲錦邊

生意堂賦玉簪花得相字

時陳無逸將
之官攸州

娟娟我蘭花綠葉何披猖沙鷺明玉羽冰蠶吐絲腸倩盼宜素綯
追琢少金相居然鐵石心愛此風露香何當競春華亦復委朝霜
折花三太息援筆臨清觴明年花好在坐客思瀟湘

老桂古字韻

人受氣之精百歲驚風雨少壯會有衰神散無復聚木受氣之偏
生旺寄於土枝幹老更奇花葉落仍吐君看山中桂秋露滴金乳
種者是何人賞者經幾主天香入酒冽吸月空懷古素娥笑白髮
對影獨起舞

詠松

老松如枯骸短松覆兒髮城中薪價高斤斧不時伐難長虬龍姿
免藏虎豹穴樵童出山暮步擔挑新月

泗濱石

荆山石有玉楚國無人知再獻猶弗售抱璞空自悲他日遇良工
乃始稱其奇寶傳數百載邯鄲又得之秦人請城易趙氏以爲疑
不予寧負曲予之恐見欺相如奉使往持璧指瑕疵衝冠遽如許
睨柱欲何爲衣褐已歸趙湯鑊安足辭奇哉古若人掩卷空嗟咨
是非定百世成敗止一時天生此尤物前後成禍基有美當韞匱
銜鬻誠非宜和氏不待價別足將尤誰人才國輕重璧豈係安危
相如真暴虎雖死悔莫追二子有遺憾仲尼真吾師泗濱一片石
不染自成緇上有華林字疑是故物遺春官雅好古傳載煩文移
主人不敢惜持貢白玉墀埋光經幾年不與賞音期無意博連城
得失輕毫釐二事擬非倫聊以資吾詩

車

舟上奔牛堰始識丹陽車規製殊草草力不任馳驅淮安距宿遷
代之牛與驢軒蓋乃差大雙輪夾一輿軋衝輓軋軋名物與古殊

梓人不知經多以方言拘輪載亦稍豐日行百里餘御者非王良
隄杙不安車蒲輪召申公養老宜徐徐干祿以爲榮愧我非純儒
小兒問金根其制復焉如輿服漢最詳具載班范書慎勿似韓昶
問學當勤渠

挽趙益之

汝父昔吾友汝翁昔我師汝時侍親側楚楚玉雪兒稍長從吾遊
學問乃大奇風木不待養垣室空遺基成立汝有望修短吾莫推
四世積善心一門無龐眉俯仰三十載三喪路人悲受氣各有終
勞生嗟奚爲牆東荷鋤叟夙受汝翁知老懷念疇昔不覺哀涕垂
欲志殿中墓健筆慚退之

挽鄧友梅

簫鼓何闐闐西風弔客船主人辭華屋輶車落荒阡蓮蓉一片石
千古懷人賢喚醒梅花魂薦之秋菊泉

牆東類稿卷十五

牆東類稿卷十六
七言古詩

北入穆陵關皆山石崩沙北風塵起行人良苦因作

大風北來沙觸面行人咫尺不相見寒日無光天地晦一似項劉
睢水戰四山确犖路摧車澗壑涓流長一綫土簷煙突兩三家鬼
貌鵠形何物變葛盧牛語誰能別公冶禽言難復辨古磁濁酒時
招飲破甕酸齏聊自薦吾聞臨菑稱鉅麗十二山河據形便姑尤
聊攝舊提封夷吾小白初營建三歸反坫侈國中九合衣裳出幽
鄆孟姜洵美共翱翔稷下羣遊逞雄辯盛衰氣脈不可測往來今
古便相禪干戈流徙人物換水火崩騰陵谷轉會使雍門重感慨
無復蘇秦昔誇羨山東負海猶如此六合茫茫難覩徧安得長劔
倚白雲手扶狂飈清九縣
出鎮口止見小峰

鎮東小峰獨無侶中峰徐來顧其弟大峰偃蹇背面去似嫌俗客

不與語無奈我行節節高山欲藏身恐無所
訪何菴觀水陸功德

山收雨脚雲氣溼葛藤刺屨穿徑入精廬桃李花漫山磬鐘聲繞
落花閒坐僧淨設伊蒲供譯說西方如說夢我方談笑耳不聞寒
窗暮對西山雲

闕題

南窗陰陰日色薄北窗烈烈風聲惡破衲蒙頭睡正濃地鑪煮餅
鑷折脚小奴驚叫老婢瞋我愧口腹煩他人豪家香閣暖生春人
乳蒸豚蠟代薪

壬辰六月旦日記異

六月朔旦昧爽天我夢蝴蝶飛翩翩一聲驚覺不可執鏗然有物
墮我前陰風蕭蕭榻震動褰帷一咤聲寂然向空抹漆無所覩堂
上呼鐙人自眠一生學道心勿動養氣未敢輕先賢元忠昔日鬼
移牀廳廡之下凡三遷雅圭臥內見匕首金帶忽置城頭邊二公

名德余不及鬼賊柳榆空自憐神姦無復照金鼎偷兒何暇哀青
氈二端是否吁莫辨一夕倉卒嗟何緣吟哦未斷紙窗白山寺風
雨鳴鐘懸起來搔首空四壁溼薪竈婢愁炊煙

庚子七月書事

今年低窪水生魚去年高亢旱拆龜陰陽似屬天公事廟堂可是
無皋夔勸分納粟令如火老稚依然鵠形餓嗟汝命薄獨可憐穹
宮巨室無凶年

臘月二十九日作

夜漫漫塵冥冥大車道上檻檻聲三十餘里天未明一軒一輦不
得窻倚坐兀兀搖心旌天寒歲暮霜雪零嗟哉客子誰汝令

和曹士開侍御見寄韻

按曹士開名伯啟至元中以潘
昂霄王侯交薦擢拜西臺御史

南臺御史忠貫日當晝妖狐屏無跡端方自是廊廟器錯落天球
閒弘璧記曾緩帶理江城猶憶尊前坐談客春樹相思白日晚月
梁入夢青鐙夕乘車戴笠高與下倚樓看鏡今非昔壯心無復夜

聞雞莫比司空鬚恨赤

壽王君明

去年中秋月色高吳山痛飲推文豪今年依舊故鄉月紛紛青紫
誇兒曹世閒兒曹何足數芙蓉仙人在江浦握筌懷瑾遺世紛黃
卷日與聖賢伍曾攀月桂日邊枝素娥夜半睡不知覺來薄怒赧
自持與仙重約三秋期一朝功成九霄去小點肯顧偷桃兒城東
白髮龍鍾叟瓣香來祝仙人壽長生辟穀未要學千載與君期不
朽

察罕布哈忠翊父歿王事母表門閭本官棄職侍養守制三年一
門節孝人所難能作詩美之

正氣初不限中華至性未嘗根六籍門閭節行世所欽父子忠孝
天應惜連環解玉理堅緻老蚌剖珠光的礫伯也執殳萬人敵血
染征衣歸不得空畱明鏡照孤鸞妾顏如花心如石鬢雲漸變蠶
絲白蓬首何曾御脂澤北堂手植忘憂草幸有斑衣可娛老不須

遣使寄當歸兒無遠志歸來早事親日短當愛日祇今三年已素
鞵宰予衣錦殊未安溫嶠絕裾非小失

雅宜山在城西五十里有德慶菴在其下穹窿山福順寺長老紹
堯翁作詩取以雅宜為號求詩

雅宜山低一拳石氣壓華嵩千丈碧不論城市與林邱愛山例是
詩人癖寒泉修竹蒼崖底青山解與高人語花落猿吟總是機舉
似山僧盡成句山僧來獻詩人號百種不如山色好德慶禪牀明
月夜館娃人海紅塵曉我知山心雅好靜犖确不容車馬造草堂
宜雨又宜晴藜杖芒鞋時一到

贈道人周大方

雙鳳人

道家者流雙鳳仙迂訪牆東老田叟叟讀儒書五十年一事不成
今白首道人過門何所求期將汗漫東北遊青蛇三尺風雷吼玄
鶴一聲天地秋吏商奔走日百里區區嗜利與名耳道眼視之海
中漚炎夏長途何必爾吾師之師柱下史紫氣曾驚關尹喜當時

賸卻五千言馬用老人詩一紙

贈潘道士祈雨

人天相距尺有咫雷電六丁繞吾指藥師馬上寄小瓢夜半一滴
灑千里古湫源竭老龍泣新秧秀濯田峻喜匣收寶劍卷陰符師
歸晏坐茅峰裏

贈鄭元明術士自言安晚之孫故詩及之

鄭安晚初為教授謁襄帥趙方一見即以宰相

期之且以二子為託端平初鄭果大拜范與葵皆擢大閫

梁灝八十有二歲自從天福建雍熙中更乾德五星聚晚賜龍頭
拜玉墀吾今之年灝相若布衣落拓何能為吟詩獨與熊兒和作
賦那求狗監知龍鍾久納少年侮耿介尤為諂子嗤吾聞長沙趙
彥仁預知鄭相秉化鈞從容杯酒託二子端嘉之際俱名臣是時
宋德已衰謝扶顛江左尚有人安晚之孫今為庶嗟我與子俱邈
迤不須諛我有許壽且道何時脫子貧清和四月天氣新共買一
醉拋青春窮通壽夭俱莫問蓋世英雄一窖塵草間惟有石麒麟

贈張明德星士

二曜五緯萬古懸甘石之學今不傳術家能以天占人聖人乃以
人占天仁義禮智性所俱吉凶禍福命使然命天表賦定不易性
我受用修則全經文二百有五字明德乃在新民先君從何處講
此學直遡建洛窺先賢功夫潛深秋日靜本真瑩靜霜月圓市聲
初散簾欲下龜筮未收客下馬一人妄計秩崇庫一人猥算資高
下縱橫二位布逆順錯落五行分制化先生拊掌笑且答二客相
看面如赭徐言至善同一初非愚不足智有餘萬物不齊氣雜糅
是心本明如太虛不須詹尹就決疑客如不信問子與

壬申冬晦叔譯史歸別小詩奉餞

蒼頡製字傳羲皇鬼神夜哭殊倉黃語言聲律未易卜嗟君楚產
學北方又稱經術飾吏事筆墨豈足盡所長郵亭一夕飲離觴他
年富貴勿相忘天無烈風海波靜白雉九譯貢越裳盛時努力早
出仕成誦姬旦坐明堂

從聖國瑤二茂才敘別

龍門世家史學祖足涉淮湘到鄒魯兒生墮地弧在左婦閉車中
爲誰苦二君雁蕩遊虎林逆旅一笑論古心地鑪畫灰事未竟推
窗看天雪意深山寒約共梅花語江水東流予北去明年春風上
石渠道傍爲我弔望諸

畱別山村樂閑菊存愛山梅村并寄景初慎與國華

南來飛雪如柳花北歸柳花如飛雪乾坤偪仄困羈旅江山蒼莽
驚歲月白雲冉冉千里外滴盡春林子規血故人回首亂峰青古
埃斜陽照離別

送馬伯亨西省郎中

驚吾學問非少年羨君功業當壯年曾聞雞聲共起舞老我輸君
獨著鞭臘寒枯柳不堪折欲別未別心茫然關塞黑風虎方嘯江
湖白浪龍正眠洪都西統數千里俊义如林足驅使好將舊榻拂
塵埃佳客可能無孺子

送千壽道同知北上

甲寅詔下興賢才吳中多士轟春雷門外鵠袍那可數一人獨上
黃金臺官途詰曲容不得直向東海窺蓬萊蓬萊水闊雲氣浮眼
看健翮摩天游故鄉六載不歸去老徑西風菊盡秋歸來四壁亦
不惡人羨錦衣君不覺館娃茂苑正淒涼古汴黃河復漂泊問卿
安在遲一見承恩內直金華殿從容薇閣演絲綸花間應隔同年
面自恨山中老樗櫟擁腫不堪逢匠石枯梢無復起春風一生空
負吹噓力

送祝君晟之官昌化

九里河梁昔攜手酒酣共折城南柳春風六載忽吹過浮雲萬事
無不有餘身閉戶忍寒餓薄宦隨方困奔走徑從蓮幙換青衫猶
勝兔園嘲白首我牀昨夜破卻甕君印何時大如斗肯將車服耀
故人未覺來往煩佳友從今出處可忘言柳邊重飲城南酒
送經之偕義齊兩舍人入燕并呈善之待制

君馬三渡白溝河溝水東流青草多踞鞍顧盼聊試耳伏櫪悲歌
奈老何古人千金重然諾把臂況受生死託肯先申白獨辭楚且
伴機雲雙入洛道遠始知離別苦地僻應思宦遊樂榮名日久當
日厭浮生花開又花落平世應無戰國才選言何日到金臺寄聲
玉堂老仙伯桂樹秋風歸去來

送節之衡之兩舍人入燕

龍駒鳳雛兩陸子並駕秋風鞭駉駉老眼一見失驚喜定知乃翁
元不死生子真足慰人心景升諸兒豚犬耳滿朝譽翁不容口世
祿固應傳不朽爲官豈計多得錢取印終須大如斗我是韓家十
八郎里中曾拜北平王碧梧停鵠已飛去玉雪娟娟今在傍往事
傷懷淚如水矻矻窮年吾老矣欲追霞佩小頡頏手倦束書攜不
起

送楊起之安豐錄判

芍陂茫茫古邊城雞犬相聞今樂土交兵往事空流水避亂居民

尚遺堵似聞此地歲豐穰要得清官手摩拊君才天馬足神駿老
大去年參選部閩中實歷裨風憲淮右先聲動官府爭看祖道車
騎眾力疾登途霜月苦牆東故人懶出門濁酒黃花對誰舞
送黃子高常熟教授

儒科一廢四十年甲寅詔下初興賢雞窗夜半同起舞竟讓祖生
先著鞭去乘駉駉首燕路歸騎赤鯉游琴川川中疑有古文學子
游故里今依然采芹思樂絃且歌官況雖清奈冷何省臺袞袞豈
足羨燕雀喧啾入網羅殘春積雨困花柳天氣昏昏如中酒怕逢
北客問新事更口東人奪佳友暮年離別意鮮懽追思得失空長
歎詩成寫寄掩關臥夢逐飛絮黏征鞍時宰輔
多被誅

奉餞子華教授北上時癸酉三月

清明上巳三月中一春天氣少冲融瞳瞳初日翳復吐黃塵漲起
西北風有客束書挾兩童南來兩馬一馬驄舉鞭蕭蕭易水東博
徒劔客時相逢怪君體弱心甚雄聲名壯健驚老翁元英磨室渺

無蹤黃金誰爲隗築宮茫茫宇宙今古同天時人事安有終江柳
自綠山花紅

送吏員遷調松江

吏員務選才具良不問他邦與吾鄉珠玉出產已足貴蘭桂遺根
亦自香諸君此行良不惡居家何如宦游樂季鷹曾憶松江鱸士
龍空歎華亭鶴昔人還鄉苦不早今人離鄉涉遠道漁舟汎澤青
茫茫客衣吹霜白皜皜朱囊結構井邑富畫戟清閒官府好紛紛
刀筆心自厭落落功名身未老要看入海運大鵬不恨出山成小
草

送吳子長入京

乙亥江城守宵遁連營錦帳排鋒刃丁男釋耒兒女嗁朱門一夕
黃金盡我時擁卒護鄉井紵袍白馬君來省石牀試劍人血腥地
鑪傳酒牛炙冷手揮談塵看落月平明索飯出門別虎林山頭卻
寄書一字不問家何如乾坤風雨旦復旦家家昇平喫飽飯君才

筦庫久繁劇我老詩書更憂患肯將出處問猿鶴自覺高低笑鵬
鷗浩蕩炎風扇區野斜日征鞍古榆下功名不復念遠道富貴自
覺顏色好俯仰疇昔予何言梅雨敲窗溼詩草

送羅秋崖

宰相昔起富春山門生四海皆達官牋書爭寶朵雲樣題詩便隔
紗籠看知君相與有瓜葛絕口不道人所難何不跨黿上金鑿胡
爲采芹上江干羣鴉飛來爭野樵三鱸不足供朝餐人生榮枯何
足歎海水會使桑田乾當軒下馬昔日盛閉門羅雀今朝閒郡兒
瑟縮手不熱先生落魄氈猶寒范陽城南丹旆歸何人送者車班
班羊曇獨灑西州淚孟嘗空感雍門彈老樹春殘蝴蝶去滄江崴
晚白鷗還北風吹雪被長巒詩囊酒榼隨征鞍請君讀詩飲美酒
歸日謝客牢閉關世閒萬事不須問西湖柳色差可觀

送吳君遠

暨陽幕職無他奇置薤一本水一盃鐘鳴張燭起署事坐看日落

庭西隅雁行鉗紙走卻立高懸明鏡分絲銖長官堂上口嘯諾時
時隔舍聞歌呼荒村人閒花自落團扇晝靜草欲蕪褰帷使者上
治牀爲出清水置玉壺小兒踉蹌老翁怒細問代者如君無楚苔
清雨古驛寒酒開寫出陽關圖君行上馬慎勿驅梅水綠漲南興
湖

送黃子高如秦州謁朱南伯

采采江籬步石礪東望海隄青不斷故人泮上誰飲酒尺素不來
魚尾短黃子卓犖文更奇命駕千里赴相思長江鳧雁不足數曠
野虎兕將何之景德寺前讀書閣彥國九原不可作寄聲故人加
餐飯昨夜秋風淮水惡

送張子野

江淮落南俯閩嶠山水相背風馬牛閉關草就北征賦日暮彈鋏
君何求袖中漫刺通姓名猶及慶曆思中州子京永敘老友白
首鶯雁陪風流今無花月聽水調但見滿目森干矛長歌送君萬

里游天荒地老令人愁

送徐舜輯

父果齋出入信
菴中齋之門

彥霖父子魏公客持國之兄招不得豪華落盡漳水流主人石眠
肩醉白天傾地坼古今愁浣花窮殺老參謀窗寒雪壓鐙昏夜門
靜蟲吟葉落秋平生故人渺江浦誰往省之遺宗武惜哉赤白兩
洪崖敢道交情棄如土回舟蘋浦思依依忽憶桃花鱗鱗肥竹西
騎鶴不可去西州萬里將安歸南山之陽木已老南山之陰木已
槁不信春風吹不蘇珍重歲寒宜自保

送仲華葛兄

蓉城諸葛何繇繇一門青紫三百年聞孫流落湘江上手握美瑾
懷香荃夜行衣繡豈足榮歸夢晶晶經山川君家元有紫荆樹一
枝兩枝枯或妍當暑歸來憩其下俛仰陳迹心茫然牆東野人頭
雪白乃翁坐上琴書客鳳毛一見眼雙明豚犬吾兒空自責追思
老少各時異坐閱興衰疑世隔江湖來往慎風波他年重會銅駝

陌
送北禪澤天泉長老入燕

金身夢覺白馬東西來禪教各一宗講師高據獅子座緇素羣集
驚盲聾天華咫尺飛墜地夜燭神光滿室紅遠師道林嗣宗風專
談義學離禪峰三葉五性總超詣一枝孽與天泉翁不泥筌蹶求
解脫不執文字迷本空黃梅四月上盧龍騎驢不下莫相逢徐州
麥飯足可飽青州布衫誰與縫盧溝橋邊石頭滑飛錫竟入明光
宮手揮玉塵天顏喜身被紅綃帝渥濃回頭卻笑虎邱石夜半不
憶寒山鐘君不見懶殘昔往衡山峰使者召之終不從天寒垂涕
石窟中

乙卯題吳江長橋一首舊有一橋亭曰垂虹兵亂毀之復創兩橋
相對

瓜步投鞭溼馬尾吳江猶是衣帶水陽侯不見駕風濤神劍自斷
長虹死木罌夜半飛渡軍縛筏驅丁命如蟻波心兩龍忽跳出一

聲金鼓波神泣興廢相望五六載斜陽獨倚闌干立酒醉波神叫
不磨劍鏗冷浸秋蒲碧江頭朱闌四千尺一望初疑幾千里左約
江流右截湖橋東出日橋西雨漁歌答響遠相失羣雁旅泊迷葭
葦荒村獨木橫野渡深夜纔能溼衣履乘輿足受兩三人猶當杠
梁涉溱洧書生眼力小如甕一觀巨麗心驚喜吁嗟人力不可到
母乃神功役山鬼憶昔燕兵下江浙馬逸風駿卷灘尾長驅水陸
一時進錢塘破竹從風靡川流衰竭王氣盡成敗反復固其理汴
師平南將彬美南人死恨樊若水采石浮橋一夕成曉出降幡人
姓李事見長編若水名若冰又改名知古

寧晉李照磨築室奉親名曰芝室索客賦之

口誦嚴君口授書手提慈姥手縫衣寸草安能報春暉遠志不敢
回當歸嗟兒客宦遊有方舅姑晨興婦在旁手供鮭菜脯下堂几
席代汝親扶將白雲英趙州山玉琴石榻窗戶閒上池飲罷燕
坐間生香滿室光照顏鍾英毓秀自乃翁草木臭味將無同借鉏

取帚面滿紅借飲甘露薰祥風

寄題俞氏草堂

浣花老人溪上住野梅官柳橋西路碧雞坊外少人行曉帶春星
自來去荒基蘚合無尋處峽川萬古流詩句紫芝之孫居澄江瓊
茅結宇青竹窗南牆夜深塔鈴語古寺白鶴飛來雙索我新吟寫
君趣開卷悠然起幽思我嘗十年卜山居經營未有灑西地風流
縱似老參謀資給應無賢錄事願君分借半閒雲勝日當攜茶具
至

題南天四時佳致園亭

桐川博士老文學出處乃在可否閒舍東支徑劣百步牆北危亭
俯兩山風花辭枝黏草碧兩竹卸籜連苔斑林皋紅葉白雁早江
國瓊英翠羽寒一年天與四時景百歲人無半日閒擾擾鳴鐘戒
晨起昏昏秉燭愁夜闌蜉蝣生死寄黃壤烏兔飛走凋朱顏主人
自得靜中趣物理常於動處觀從容琴書寓真樂邂逅尊前追清

歡良時佳友不易得惡客未至門先關

題立齋不礙雲山亭

英英山中雲蒼蒼雲外山雲山偃蹇若高士不傍貴人門戶閒竊
堂老人家四壁詩句曾參浣花客一亭半落平疇外拾盡乾坤眼
猶窄樵歌斷處起寒青鳥影明邊際空碧玉鸞不入巫陽夢滿榻
凝塵室生白昨宵礎潤卜雨來岸巾關角小徘徊忽然一片黑模
糊失卻萬丈青崔嵬有風颯然起林薄如覺天日徐徐開推窗看
山色如故斷雲飄零不知處

書范石湖白髭行後

渡江莫盛乾淳閒虞范諸賢鬢未班功名草草負遺恨老死不見
鞏洛山我近經行石湖路范家水名王家墓風流一代竟澌盡手
澤何人爲珍護直當慷慨論興亡奚暇悲歌歎衰暮

題程子充少監家藏二首遺墨前一詩程御史臨終遺其子端甫
詩也後一詩元遺山女初適端甫時送別詩也端甫子充之父

元氏子充之母翰苑諸公題述徧矣

教子惟欲詔嫁女惟欲官牀屏觸頭乃翁怒文書銜袖媒姥謾癡
人一笑可絕倒古訓相傳良獨難大夫有愧程監察上谷敢望元
遺山易簣微言尚典型出門別語重丁寔子無橐裝與寶劍女無
繡袴與金屏各贈驪珠五十六藏在肺腑為深銘梓喬俯仰俱莫
及冰玉清潤尤相形水衡使者直而溫遺山宅相監察孫視身務
學承先志範世傳家示格言正大去今八十年流風遺俗猶有存
誰能題詩墓柏下使兩仙翁起九原

之末

春申邑下荒江濱有眼不識錢江春竭來南北兩高峰乍見西施
眞美人曉妝濃淡看不足誓結鶉衣老湖曲安知湖曲有高人如
此仙姿尚嫌俗別尋大滌登天柱氣壓羣峰三十六歸來書窗風
雨夕潛聽三竺山靈哭睠言玉局老飛仙摩娑銅狄今幾年神蛟

飛鼠亦何有金臺玉室空茫然天風吹醒丹泉酒碧桃津遠人回
首石上禽餘擣藥聲絕憐無訣授長生今年卻被山靈笑依舊湖
隄拾芳草

題金陵海月潮卷

太陰朔望有盈虧海外隨之互消長口夜秦淮湧月來一輪卻挂
鍾山上山中那得有潮音尊師鼻息如雷響

題尹存菴行卷尹居賈門下鍊金敗後流落海南依陳文二公寓
廬陵中齊須溪贈之記銘甚善復回杭州道過索詩

錢塘築隄高於郿黃金鑄成九鼎移木棉羈魂招不得方士入海
從安期廬陵二老當時在翰墨光芒透紙背爾後空聞化鶴歸我
今欲見嘒鵲拜長安市上重經過逢人問是伯休那勸君且盡遂
初賦人家國事竟如何

題分宜謝草廬行卷

袁曹官渡爭雌雄荆州僑寄大耳翁涕流髀肉消不盡試與元直

游隆中隆中自有躬耕者布衣抱膝茅簷下從容一曲梁甫吟不
覺將軍三枉駕室中屏人纔數語跨荆包益成鼎峙南陽陌上龍
出雲永安宮中魚得水古今成敗直郵傳英傑千年不一見識拔
端由品藻公位置無嫌草茅賤山中謝客江煙昏誰攜行卷到柴
門手披康樂草廬賦知是蘭庭佳子孫春塘柳禽成昨夢炎興相
業更誰論洞庭三江風浪奔鯨魚出沒相吐吞何爲四方歸來些
山堂鶴怨能移文

題張南山慶九十詩卷

丙寅六月余年七十五矣

翁年百歲少十年我少公年二十五天與翁齡百二十我已化作
原頭土延年賸得飲食樂損壽多應作詩苦梅開儻獲登公堂一
醉猶能戴花舞兒孫拍手向我語公漆點鬚貝齊齒降原陟嚙步
如飛飽飯何曾飲人乳夢中猶記前朝事二老相逢必歡喜

題王復初所藏子昂臨禊帖

昭陵玉函出人閒開平經今四百年永和遠距貞觀先俛仰陳迹

俱可憐古人學書如學仙筆鋒誰入玄之玄水晶宮裏佳公子風
流翰墨皆天然吾評逸少非真逸史載深謀并絕識獨畱繭紙博
千金似是藝成能掩德名士由來屢逼真書空咄咄彼何人遺才
流落稽山下修竹娟娟萬古春

題登瀛圖

世傳闔公學士圖意象曠野難形模山僧臨本持索句展卷復掩
空長吁秦王功高塞宇宙搜攬豪雋供馳驅內懷矛甲伺同氣外
示閒暇耽文儒臨城開館構傑閣坐見瀛海移西都分番夕宿無
厭倦珍膳日給何豐腴天光下照天策府煌煌星象經天衢房喬
夜半進危計平明一矢驚臨湖羣賢崛起輔貞觀亦有淹滯如顏
蘇惜哉燕翼謀未善祥麟接武容妖狐殿階置笏怒未解田舍收
麥言何諛策名書府真有覩空與老姥扶天樞貴人一代骨已朽
史筆千載心猶誅闔公絕藝今亦無長安落日明榛蕪
跋明皇貴妃並馬圖

聲殘玉笛梨花月笑指驪泉浴香雪宜來天駟玉花驄醉傲金勒
搖東風阿環並轡微相顧一點芳心情鶯訴五溪老奴侍案側招
搖先入華清路行幸東西春復秋那知憂樂兩相酬朝元警蹕猶
清道胡馬長嘶出薊幽猿聲霜冷巴山曉錦韞遺香清渺渺南內
淒涼進御稀海雲空闊蓬萊小淚溼花容春雨餘縱有丹青畫不
如
跋趙太祖與韓王蹴鞠太宗石守信楚昭輔黨進環而觀
紫微垣近一小星作戲敢與太陽敵諸將旁觀信雄武不逃書記
收兵策開封府尹眞天人受譖朱崖疑老臣幸自宮中啟金匱忍
使涪陵竟隕身

題萬戶府瑞麥圖

河中之野木連理文人作頌何所美鯉湖之水蓮雙葩史臣記異
不足誇木葉飢來豈堪食蓮花遠觀空有色由來上瑞是豐年英
蓉池外麥連天一莖三穗攢秀穎好事軍中萬口傳闕武堂成政

多暇刀劍不如牛犢價老農噉飯看昇平奇祥異產從天下香餌
先收夏隴雲雪匙可卜秋田稼絕憐西蜀杜參謀困飢空懷當世
憂崆峒麥熟無人穫且問王師休未休

題劉晦卿月樓圖并餞秋闈之行仍不犯月樓字

君不見劉越石晉陽鐵騎圍城急一聲長嘯震山谷拋弓散走羣
兒泣又不見庾元規武昌僚佐相追隨坐據胡牀夜笑語不知賓
主竟爲誰枕戈待旦成何事終讓著鞭先士稚況復西風塵汚人
茂宏舉扇私還第嗟嗟二子逢世亂誤長清談室致患爭如今夕
倚闌人一生飽喫升平飯百城桴鼓夜不鳴萬里山川秋愈明黃
鶴孤飛白鷗睡卷簾露氣下三更初聽笛聲何激烈再聽書聲更
清越素娥密約無人知今秋丹桂來先折

題金君澤家山飛雪圖

吳姿楚態誰使然白石齒齒山娟娟孤雲欲斷不斷處中有萬斛
瀟湘煙黃榆日晚長洲路木葉山頭幾風雨一聲寒雁江南書萱

草靈椿解相語君應知山風獵獵遊子衣畢逋有待何當歸
應昌路驛傍有古松一幹生十八枝爲斧所傷江西胡生圖以示

州長官命余作詩

盧龍池北道應昌八月飛雪六月霜陰風蕭颯百草僵牛羊隴坂
狐兔岡破郵古廟人鬼靜傍植巨木百尺強孤根縣縣蟄幽土枝
幹直上凌穹蒼何年堂堂十八公會朝待立冠劍長中有二公能
死節張許崛起存睢陽餘生幸獲逃刀斧遠地何由選棟梁西江
行客苦好事一見攜之袖裏藏摩娑老眼識奇怪興作萬里神蒼
茫寒齋無復丁生夢腹內惟聞葵藿香

唐人洗馬圖

君不見雀鼠谷抵介休壁馬甲不解王不食又不見泰山馬色別
爲羣東封望之如錦雲英雄角力多相值嬖幸承恩思自媚不辭
汗血千里勞驅死塵沙那得避何如落日清水灣驂驪獨步春草
閑圍人袒臂沒兩踝控轡欲上未上閒靜觀物理坐歎息玉人慘

淡何人筆少陵野老最善評弟子曾入將軍室

跋牧馬圖

平原淺陂水草甘美枯梢吹風日落塵起物色祁連山前路又似
踰關渡隴水一人解鞍枕欲睡一人胡服手仰指一人持轡卻回
顧萬馬攢蹠行復止飲者齧者各自然馳者忽在立者前駒而幼
者隨壯者浴者出沒晴波川風驟雪尾不受鞭並驅逐者如爭先
須臾兩騎獨殿後戎笠持兵相格鬪老羝挾乳自成羣牧羝人遠
傍無救何人丹青手模寫礧礧中有全馬陸子作詩配駒野干
古流傳好事者

栽桑

細聽鄰婦低眉說年年育蠶苦無葉山童執筐入市賣一稱百錢
猶未愜更兼春風上窗寒忍見蠶飢頭戢戢買絲織絹輸官外空
借鄰機閒一月阿姑卒歲無襦袴小兒露骭風吹裂今時縣官清
且明課民務本令必行擔桑頽肩荷鋤去青青布種環郊城明年

家養一百箔巷響線車棟花落滿籠新絲白雲香聽賽蠶官鼓聲

樂
賦燒筍竹字韻

先生朝盤厭苜蓿筍味得全差勝肉蒼頭埽地犀角出赤燄騰煙
龍尾禿土膏漸竭外欲枯火候凝溫酒已熟撥灰可惜衣殊錦解
籜猶憐膚躍玉青青無日長兒孫草草爲人供口腹盧家丞相蒸
葫蘆石家無人煮豆粥去毛畱項有何好擣韭作齋空自速不如
野人工食淡自辦行廚入修竹句裏曾參玉版禪曾中會著箕箒
谷主人不問不須瞋昨夜西風響林屋

竹鶴窺碁雪字韻

秦馬投鞭江可竭別墅從容謀已決蘭階小兒呼與碁敵手不覺
平時劣青岡鶴唳走先聲捷書上牀屐齒折局中勝負俄今古身
後功名謾豪傑何如山中靜相對風度幽篁韻清絕林深有客遇
神機柯爛無人傳妙訣白頭老姥獨解事化作仙禽欲饒舌石枰

落子忽驚飛五月驪山啄殘雪

牆東類彙卷十六

牆東類彙卷十七

五言律詩

四月八日偕張菊村鄧匪石洪樂閑遊地西諸寺以山高水長分韻得長字

門外青山寺西行半里強童分泉茗潔僧供飯蔬香地僻紅塵靜
心閒白日長少年餘氣習棋酒愧疏狂

春雨歎

山城春強半雨腳亂如麻潤麥還傷麥催花又落花閒來憂歲事
老去惜年華臥聽空簷滴應無夢到家

驟雨

絳帳虛堂設簷牙雨驟傾已過驚蟄日未聽候蟲聲向晚飛蚊出
偏工傍耳鳴山靈戲窮士邀渴夜相迎

立冬

旱久何當雨秋深漸入冬黃花猶帶露紅葉已隨風邊思吹寒角

村歌相晚春籬門日高臥衰懶愧無功
夏港口中

微暖背曝日輕寒面受風人行官路側鵲起埜田中細草陳根綠
疏林病葉紅故人雲水隔來往愧衰翁

高郵寶應道中

長淮昔戰爭廢地少人畊埜壁三家市官亭十里程田夫時識字
水鳥不知名薄暮宿何處孤雲又一城

客中度歲

歷徧青徐路東風送入京車中守殘歲道上拜新正椒酒今誰獻
桃符舊未更故園梅正發不見玉崢嶸

喜雨上理同知

蒼蒼雖莫測誠意儘能回履草穿雲去鑪香帶雨來神龍如有喜
旱魃不成災四埜車聲歇懽聲卻似雷

贊王容溪

勁竹持高節餘花表晚香一瓢顏子巷六籍鄭公鄉後學師珪行
先天發寶藏空攜經世具獨立暮山蒼

和朱春卿寄詩韻二首

練江詩酒社聚散十年春君作并州客身爲絳縣人一牛甘送老
五馬未全貧出處嗟殊異相思意卻真

壯遊不知倦老境怕逢春自分無知己何堪欲避人飛花空有恨
巢燕不嫌貧獨憶延陵客風流似季真

和誼齋惠詩

鴉室徒勞甚鳩居奈拙何田園空晚歲梅柳得春多徑合思除蔓
墉高許附蘿呼兒淨埽地恐有故人過

和心困雷雨地震詩

天公惡作劇翻手變炎涼海運五山動江高數尺疆震雷驚失匕
漏雨苦移牀不慮填溝壑眞成老更狂

奉和子華秋懷四首

九日秋懷惡那驚暑氣隆苦吟愁作祟多病藥無功荷客來相訪
扃門弗爲通怕談當世事遺患及孩童

况值艱難日那當老病生後生欺舊輩俗吏笑高人易埽張超霧
難清庾亮塵鹽梅正相得鼎鼎盍調新

痛飲消愁酒愁城未肯降陰風吹北戶斜日上西窗艱食懸禾畝
苛征及葦江何曾入官府深愧鹿門龐

得志瘳民瘼何期與願違青鐙疏簡冊黃土汗征衣道路嗟于役
山川賦式微秋風動鱸興應不踐危機

和唐人閒字韻詩卷

鼎鼎百年內何由一日閒衝冠無怒髮攬鏡已蒼顏未易桴浮海
應難展上山春陰逢甲子愁聽溜潺潺

贈遊士艾介翁

三江懷故國七澤弔孤臣有客詩招隱何心賦問鈞明時無棄士
晚節少全人遊子歸何日農工已及春

丁酉春識慶上人於錢塘鄧君善之索余同賦孝僧詩余請以二
十字盡記其實既成善之喜而書之不知何人持去後二年上
人訪余江上復書以遺之

襁褓已離乳干戈復異居關河行欲盡母子遂如初卓行先賢傳
前緣釋氏書悲歡知已極讚詠欲何如

贈潘道士祈雨

日者早太甚天平禱有諸震雷驚破柱驟雨喜隨車精意通無閒
神功斂不居魯侯明德頌好接有年書

送劉青璧赴湖北道按察

飄然南去客使者趣揚舲白帝秋雲滑黃牛暮雨腥尋詩行楚甸
問酒宿巴汀北道人多樸無詞到訟庭

送班同知

專城鎮西土世祿食南方紈袴洗餘習簪纓襲舊芳高風仰喬木
遺愛指甘棠他日循良傳應畱姓氏香

送楊伯可赴省

秋水芙蓉幙時聞嘯諾歌簿書精力盡臺省故人多別酒禁愁得交情奈久何懷君四德備廉正復謙和

丙申歲侯仲達之官洪澤

淮楚俗輕揚蕭蕭古戰場殘兵空壁壘曠埜失農桑魚鱉西風市菰蒲淺水塘君山足詩景何事訪漁郎

送王縣尹之官湘潭

江亭重執手雪壓暮潮平臺閣踰三載弦歌又一城遺鄉因楚俗令尹似湘清別駕余知己分廷託寄聲

送郭仁卿之官三衢

憲府自清要胡爲墮冗曹平反猶用恕糾錄肯辭勞才富家何瘠官卑志愈高青雲遲得路勝我落蓬蒿

送吳次尹惠州巡檢

萬古羅浮洞江樓著老坡子西相繼出廷秀晚經過欲訪先賢去

其如遠道何天寒與君別莫聽戾戾歌

察罕布哈教授滿別

丁卯鄉試第一二三舉不中保充掌書

小卻官雖晚先登藝最優文章九州外科目萬人頭桂折金天月

芹空泮水秋澄清在君輩憲府正旁搜

送廣平孫教授

廣平河水北古暨浙江南兩地音郵闊三年宦況諳采芹聊共樂食棨豈能甘別酒黃梅浦情懷老不堪

送句景范教授之官澧浦

南楚離騷國清風澧有蘭相從泮水樂獨棹一口寒遠地重逢少新知欲別難高平讀書室好爲埽荒殘

送張慎與歸海陵侍養二首

胡風吹柳絮記別一年餘君出當歸養吾窮久索居乍逢論繼緒欲別又躊躇一葦長江隔時時卜鯉魚

英才銷落盡世事一凭闌以我相思切知君欲別難暮雲南國暝

早雁北江寒獨羨萊衣樂春風鬢未蟠
送周子華南歸二首

江城少公事幕府得詩人乍見顏如舊相過意轉親不堪時事改
贏得鬢毛新後夜孤舟別西風返月輪

此日與君別重逢未有期衰年行欲盡近事或難知浩蕩風雲會
蕭條草木悲三吳多俊傑試與問安危

送魏叔華歸越
閱世滄江上柴門幾送迎雲若雖異路車笠見交情春雨西興渡

梅花古粵城寄聲賣樵叟莫羨錦衣榮
送長蘆穆生歸鄉來別

聞君返桑梓老我屏邱樊命駕輕千里臨歧贈一言爲山方進簣
有水必觀瀾顏孟千年在遺經得盡繙

送張仁卿二首
四海張公子騰書盛贊賢論心纔幾日屈指逐經年鴛案翻新牘

雞窗理舊編遲君得小暇已索贈遊篇
作縣徒勞爾飛黃服短轅棄官真不惡惜別卻無言再試知何地

孤生老是村去逢南國友梅嶺正花繁
送李正齋

龔黃吁已遠循吏捨公誰臥轍畱行色歸裝減到時朝爭馳薦剡
郡議立生祠寂寂燕臺客難酬國士知

送唐子華
海內多英俊交情得似君慇懃別後語嗚咽病中聞吟棹秋溪月

歸帆晚浦雲可憐江樹隔何日更論文
送龐西山

行李不盈車西風兩鬢華歷官多在考歸蜀已無家人去空芹水
舟行及藕花飛騰君有日吾計老桑麻

送汪太無道人
面帶青山色道人何處來一壺懸日月兩袖裏風雷鉛鼎養活火

寒鑪撥死灰出尋方外友不語又空回

送麻姑山道人

麻姑一女子處處有仙壇地古留遺迹君今住此山流泉清澗底
落日亂峯間聞有蔡經者時時得往還

病中寄諸友

五福人間有吾兼病與貧死寧遭疫鬼生不媚錢神采藥思方士
遺書荷故人城東有別墅風雨失殘春

病枕

瀟瀟風雨夜病枕厭長更輾轉終無寐呻吟不絕聲鼠牙乘壁暗
雞翼報窗明辛苦牀前婢頻呼睡不驚

病枕不寐

大率憂兼病尤非老所宜吟愁枯兩鬢時事鎖雙眉瘦削嫌衾薄
醒眠覺漏遲拒霜三五朵應愛北風吹

病足

筋寒苦蹠盤尊足詎能勝誰謂行多露全如履薄冰城非鞞可踢
階豈鞞堪登設有蒲輪召安車未易乘

許正卿傷臂

危機在平地險不是邱陵偶爾一投足幾乎三折肱鞠躬難盡力
攘臂必須繩他日三公貴輶車好穩乘

題張招討墓碑

輕兵戒深入險寇勿窮追失勢因魚服畱名有豹皮空歸先軫面
竟裏伏波尸廟食真無愧嗟峨死節碑

題孔平山墓銘

葬金陵臺下

東魯家猶在尼山道最尊教能行萬世福不庇諸孫薄宦三千里
遺銘數百言不埋防墓側空弔雨花魂

挽閑閑真人父司徒

堂堂遺一老五福壽而康系出安仁譜身居榮祿鄉春山樵獨隱
晚圃菊尤香有子知何憾騎龍下大荒

樵隱晚香堂名

挽朱自齋總管

郡紱雖重綰齋銘祇自修陰功淮海積遺愛浙江畱世事桑田水
人生薤露秋葢棺奚復憾簫鼓咽原頭

挽貢仲章學士

才優如貢禹經行復精純海內多知己江東尚有人林泉隱君子
臺閣古名臣九轉丹成去青山宰木春貢臨終夢九轉丹成生羽翼之句

挽吳朝奉

幼時桑梓敬耆舊惜凋殘蕭戒師吾儉龐言遺以安天平非不壽
命也亦何歎誰筆延陵墓嗚呼永不刊申浦季子墓有嗚呼有吳延陵季子之墓十字相傳

夫子之筆

挽許士元州判

有數應前定浮生難豫期為親嘗藥去俄自載喪歸循吏堪為傳
遺民議立祠靈輻無路送老淚不勝揮

李君美夫婦挽詩二首

君家全盛日父子佩金魚太母常甘旨曾孫列起居榮華既消歇
憂患卻乘除執紼門生老何堪數輓車
一死人誰免如君獨可哀離鸞不忍訣止鵬併成災從吏聯翩去
喪車寂寞回淵明本無疾早歲賦歸來

挽孔東岡

此老典刑在粹然瞻德容百年守經學一邑號儒宗泗水乾別派
泰山摧小峰孝哉廬墓子滴淚死青松

挽沈梅溪

其子元從子學

未遊通德里曾識謝家兒鄉邑推先輩山林養令姿梅花記開落
江水閱興衰耆舊凋零盡西風老淚垂

挽趙石居

地望倫魁重冰銜博士清棄官為隱計因謗得詩名水竹方成趣
松楸忽愴情鄉中耆舊盡老淚灑銘旌

挽李德夫

一種金籟業相傳五世餘貧無司馬壁富有善如書四子供甘旨
諸生問起居典刑無復在丹旒泣隨車

挽柴青山

衣冠百世祀齒德一時尊白馬朝京客青山負郭門廢興疑有數
生死復何言空有懷賢淚西風滴古原

挽何漢卿

被服安儒素行藏任性真終於太平世奪我老成人喬木蒼蒼古
孫枝奕奕新西鄰聞夜笛哀淚一霑巾

挽朱南伯

爵齒不踰德天平奪此君官纔稱主簿郎已轉修文玉質埋黃壤
葩辭散彩雲從今書帶草不獨鄭公墳

挽謝竹所

江左稱羣謝青山幾夕陽田園遺一老詩禮訓諸郎勝日攜尊樂
清風隱几忘靈輻無路送東望涕霑裳

挽杜華父

鄉里多遺老朝廷少用儒公初升國學官止教生徒衛道心猶壯
憂時骨已臞遙知埋玉處風雨暗中隅

挽趙鼎之

太息佳公子尊中了此生吐茵人不怒罵坐客皆驚北闕□□就
南柯夢已成老親併弱子此恨若爲平

挽容山陳同年

勞勞百年內人物老滄洲大志生難測微官病卽休江花自終古
榕樹不禁秋雌甲嗟猶在哀詞淚不收

挽邱景遊二首

粹德如金玉鄉人稱善人百年蔭喬木五子拱靈樁注管經行路
蒲龕宴坐身今歸兜率去弔客謾霑巾

遊公門下久公亦眷吾深疾病忘憂卜詩詞辱賞音衰年空滴淚
舊事獨傷心秉筆書潛德空疏力不任

挽俞時齋

襄陽耆舊傳一覽涕無從入社深衣叟齋居糲食翁市朝終不到
林澗或相逢有子能傳業棺衾得慎終

立齋挽詩

少日增庭秀暮年山澤矐吟魂繞花竹客淚灑江湖莫唱貞元曲
空遺洛社圖絕憐埋片玉幸喜產雙珠

挽陳蔡心

遺才今已老生計晚方宜臥病經旬月孤墳寄一隅逢原惟一女
伯道竟無兒執紼嗟何及哀詞與淚俱

挽何有開

奉檄垂三考還家甫一旬風雲千里志露電百年身講席辭多士
帷堂泣老親三生有遺恨五福少全人

代挽奉政陳公

江淮離舊隱遼碣著新功驟耳非凡馬蒼髯獨老龍韓銘空紀實

曾簣遂華終先世盟猶在寒山淚滴松

故夫人陳氏挽章四首

誓節攜孤幼塵匳不復妝夜機同婦織曉隴課童秧甘旨期終養
哀榮畢後喪前岡指陶墓弔鶴重淒涼

白首萱堂上兒孫卓有成膝前分栗果枕上聽書聲鳳誥將金闕

鸞驂遽玉京舍西蘿月夜嗚咽隴泉鳴

憶乍升堂拜通家指舊盟為言兒有立多賴友相成喜檄方形色
哀銘忽愴情生芻一掬淚端為玉人傾

萱草北堂深霜風一夕侵斷機思往訓捧檄負初心仙府雲駟遠

佳城月魄陰平生五鼎養空復美衣衾

五言長律詩

送衛月山歸鄉

大魁涇之孫

臚傳居第一科目豔當年慷慨誅奸佞從容秉政權諸孫今白屋
舊物止青氈幾見黃梁熟何當鐵硯穿書聲月廡下燈影雨窗前

學者師王式時人老伏虔不令官濟濟空負腹便便桑椹鴉偏惡
桐花鳳可憐縱無當食祿猶有可耕田卒卒纔傾蓋依依願執鞭
二翁俱耄矣一別重淒然握手出門去桂花香滿船

挽張宗師

鳳曆歸明主龍韜識老臣衣冠朝日月劍履步星辰極品躋黃閣
齋居入紫宸存心妙經緯贊化極彌綸道教崇簪笏詞林壓搢紳
儉慈爲世寶安樂是天民夢卜親如見祈禳立有神穀城黃石老
衡岳白衣人密勿天心契便蕃帝渥新壽尊來玉醴法樂宴崇真
重錦頒衣襲精糜享膳珍青溪拾瑤草玄圃植靈椿化鶴聲逾遠
飛鳧路已陳松青凋晚歲林縞失殘春世事柯山局人生桑海塵
十齡傳正印一德鏤堅珉

挽吳埜堂

保護兵衝日焦勞歲歉時江湖一老叟州里百年思家尚立元學
人遵義役規陰功宜有後隱德固應祠擬作榮鄉記誰鐫有道碑

碧梧雖未識宿草尚堪悲偶泊梅江堰空吟薤露詩

牆東類稿卷十七

牆東類稿卷十八

七言律詩

洛中鄭慤三伏之際率賓僚避暑於使君林取大蓮葉盛酒以簪
刺葉令與柄通屈莖輪囷如象鼻焉傳吸之名碧筒杯故坡詩
云碧椀猶作象鼻彎白酒時帶蓮心苦出雞丙寅五月宜興州
賞誠以此為題為賦十一首

外直中通異眾芳嗅來葉氣勝花香一杯先吸鑑湖月滿口潛消
玉井霜尤勝朱櫻煎作蜜何須紫蔗壓為漿細看象鼻彎彎曲刺
手猶嫌綠柄長

昔宴賓僚避暑林傳杯故事到如今屈莖聊當黃金杓刺葉先抽
碧玉簪聞得鼻端香馥馥流從舌底味森森坡仙愛釀柑為酒卻
道清蓮帶苦心
有客相傳避暑方采蓮不用采花房綠盤擎重盛珠露碧管虛中
溜玉漿象鼻捲風隨手曲麝臍入水透肌香醒來忽憶涪翁句摘

實分甘共母嘗

碧雲影裏倚闌干鯨吸詩人酒量寬惟有鑑湖堪避暑遙知玉井
正生寒蓼開翡翠微通竅滴下真珠滿走盤一葉偶因風颭破帕
羅香沁幾時乾

荷亭避暑約傳杯醉引清香入手來象鼻形彎通曲柄鴨頭色重
潑新醅中擎玉液休傾滿半捲青心莫展開春酒一江能吸盡始
知李白是仙才

當年避暑使君林暇日諸賢肯過臨荷帶露香須緩折酒無風韻
莫輕斟玉簪先透玲瓏玉金注徐傾激灑金葉底可能甘勝蜜卻
憐小苦是蓮心

不須酒盞吸雲紅刺葉潛令與柄通碧色輪囷彎到底黃流激灑
注當中醉來欲捉波心月醒後因吹水面風卻笑求仙求不得金
莖半折露盤空

露盤淨植水中央好借詩人引玉觴象鼻巧能通玉柄馬蹄更與

摘蓮房溫公蓮子詩形如大馬蹄吸川不覺西湖闊漱石尤便玉井涼醉裏興

來休折遍也畱數葉覆鴛鴦

越溪女子翠紅裳來與羣仙侑一觴葉展圓盤如許大絲連曲柄
更能長清高勝飲金莖露甘滑疑餐玉薤霜醉手傳杯猶未穩碧
痕微損迸瓊漿

尊鼻自古宴嘉賓末世風流意轉新筒葉捲來由鄭氏杯荷製出
始唐人一時花草空傳玩他日賓僚但飲醇外直中通比君子輪
他光霽滿懷春

刺葉為筒製頗奇鄭公故事老坡詩擎來入手成敲器注在當心
卽漏卮玉露有香黏翡翠碧雲無影浸琉璃假饒吸盡西江水鉢
內生蓮是幾時佛圖澄取水燒香咒鉢中生青蓮花

孟德孔明蒲首命晉書孔明兩馳驅三國人才信有餘未肯草廬終此世不知精舍
讀何書木牛古不傳遺法銅雀今成一廢墟畢竟忠邪天不識當

年成敗復何如
與琴師談琴

至樂無聲識者希
有聲終是假人爲
一時得趣惟元亮
千載知音欠子期
欲寫性情初動處
當原律呂未生時
夜寒月照虛堂壁
鶴唳猿吟總是詩

癸酉三月園亭小飲之明日又適澹齋所薄暮醉歸廣文寄佳句

二首走筆次韻

名花濃淡總相宜
對此如何不醉歸
絲竹既無娛朗日
園林可是樂清時
蛙聲閣閣那成部
蜨陣團團戲作圍
酸杏不堪嘗煮酒
纍垂空自壓青枝

綠陰未暗漸紅稀
逢閏春遲一月歸
古有惜花如子美
今無好客似當時
酒雖薄薄聊澆渴
棋亦平平旋解圍
斜日倚闌人半醒
試尋青子摘梅枝

同善之仲實無逸遊飲夜歸分韻得星字

歲華搖落江頭樹
客子漂流海上萍
盡染緇衣無復素
空留白眼爲誰青
對牀便可供高臥
把酒何妨弔獨醒
太息此心徒炯炯
奈何余髮已星星

八月初游浮遠誼齋有詩同賦二首

曉渚風移畫舫輕
秋原日射繡衣明
自攜玉麈看山色
盡屏繁弦聽水聲
季子高風喬木古
春申往事暮潮平
塔鈴自語無人會
飲散江雲霽月生

此山猶姓楚春申
珠履風流幾斛塵
尊俎一時俱上客
興亡千載屬何人
蕭蕭病葉悲霜木
采采幽花識澗蘋
白鷺不知今古事
臨江一笑岸綸巾

句容賦歸

誰教老子誤諸君
幸自庵中臥白雲
舊令尹非新令尹
今將軍是故將軍
相知自謂樂莫樂
一見不如聞所聞
逋客急須回俗駕
北山早已有移文

迴途入玉晨觀圖經云周時太史郭真人宅周安得有真人哉有
丹井養龍池白馬老君瑞像在焉壁閒刻林靈素塵字韻詩戲

次二首

洗淨人間萬斛塵玉虛壇上夜朝真井深莫探丹泉髓屋小難容

老檜身廊下有晉檜一符召得龍聊小戲料分與鶴未全貧名山

采藥無空返不見仙方見異人

太虛自是隔凡塵惟恨神霄事不真泥馬空遺立聖像池魚恐是

小龍身久知天上仙官貴不救山中道士貧舊宅固應存太史徽

稱早已號真人

無文上人捨財鳩工建新安橋普濟眾生聞者讚歎隨喜賦詩一

首

高僧自有神通力杖錫橫空塔兩隄會見丈夫乘駟馬寧無學士

助腰犀一溪帆影浪花轉百尺闌干石筍齊有客天津閒信步杜

鵲聲裏夕陽西

七月二十九日夜大醉宿陸宣慰廨旦日以一詩謝

夜行被酒止公亭耳熱呼烏客盡驚囊下自慚非畢子吐中不覺

臥王生相寬吏舍情何厚誤污車茵罪亦輕戲馬儻容賓落帽更

拌投轄飲天明

東人索酒

不到青州已月餘麴生風味近何如東坡杯小君應怪北海尊空

客漸稀奇士正堪來問字癡人那復肯還書分田種秫嗟何晚獨

盼庭柯望白衣

中秋見梅

雁叫霜寒木葉飛西風亭下立瑤姬從來冷淡能禁雪不意孤高

也競時松友舊盟寒歲晚桂昏佳約赴秋期倚窗索笑空姝媚汝

解能寬宋玉悲坡詩奔月偶桂成幽香

十月下旬驟寒小雪

朔風翻屋浪誼虺潑墨濃陰掃不開天上撒來雲母粉人間喚作

豆稽灰細民共喜宜新麥老子先須探早梅為怕玉容禁不得數
枝和淚折將來

雪江獨釣

極浦寒雲壓雁低石磯老叟手如龜茫茫沙上銀千頃裊裊風前
玉一絲鷺失蘆花驚月早魚吹柳絮上冰遲故人物色嫌相認縱
有羊裘不敢披

虎溪畱題辛卯三月書于劍池

霸業荒邱春草長只聽兒女話真娘虎來墓上猶應怪鹿入宮中
儘可傷太息乾坤空浩蕩不畱豪傑管興亡屬鏤抱恨沈江底潭
碧猶生古劍光

辛卯入杭呈王察判二首

中州人物古猶今復見風流正始音當日乘驄持繡斧他年化鶴
度青林誰知救世安民術卽是求仙訪道心鯨浪駕風吹未散溪
山何處獨追尋

古人糟粕在遺經聖學非由積累成每向同中參孔釋時於異處
別朱程一川水滿源頭活半夜天高月色明下學工夫遲十載小
儒終在霧中行

入杭懷古呈史藥房

某邱某水記兒時陳迹迷茫問不知觀裏看花空有菜山南種豆
落為蕘林疏想弋逋仙鶴壁壞應墁坡老詩只怪西湖頑面目濃
妝猶自學西施

浙西道院并題雙檜詩和子華韻

黃堂曾著宰官身髣髴兒時記不真圖志猶存千載舊棟梁安有
百年新繁華開落無三日雙檜輪困經幾春應比首陽高節士采
薇不食為求仁

苦雨

積雨能令朱夏寒少曾見日上三竿風吹滄海俄然立水瀉銀河
透底乾誰辦好心來拯溺姑留老眼去觀瀾蛙聲只在牆根草卻

怪泥龍不久蟠

居高明

每愁仲夏多溽暑更愁今歲少南風身無臺榭可獨處眼到山川

便不同只從月令高明處參透中庸問學功虛靜若能超物外炎

涼何必介胸中

七夕祈雨

彩雲朵朵西風散銀漢昭昭北斗傾車上耕夫愁欲泣橋邊織女

笑相迎蝗飛近境行將及龍臥深淵自不驚病枕怕聞簫鼓鬧誰

家乞巧到天明

偶書邸壁

俯仰隨人似桔槔功名落落倦英豪婆娑僅可供賓戲寂寞安能

免客嘲空有雲心懷鶴髮竟無風力舉鴻毛祖劉起舞成何事歲

晚柴桑是故交

效後村體

十載村居學養恬未忘習氣有人嫌課童薙草心先快助僕移梅
力尚兼不分烏鴉啼烏樹絕憐紫燕傍茅簷路逢野老嫌相問新
歲凶穰可豫占

有感三首

場屋當年負雋聲白頭牢落竟何成一生受用兔園冊千載應無

麟閣名被服易招山鳥怪題詩難學野狐精羊裘老棄漁灘上印

綬新加少傅榮

桓榮也

子美閒關離亂際堯夫生長太平年可憐橡栗天寒拾不似鶯花

日晏眠憂樂在人均是命盛衰有數總由天腐儒老矣無奇計獨

立斜陽竟惘然

歲晚田園半已蕪緇塵袞袞落征途送窮不見昌黎富乞巧翻成

子厚愚瓠下早知嘲尚白缶邊何似醉呼烏鴛肩枉作常何客只

合新豐伴酒徒

闕題

區區抱甕不辭勞俯仰安能似桔槔兒子從教耀車服丈夫何用
樹旌旄但思有酒身無事始信求田策最高妄想虛憍無處著退
然斂手是英豪

黃山上先冢葬處

一盂麥飯一豚肩寒食風花淚眼邊儻得黃泉相見母勝如白日
上升天萬家置去成何用雙鶴飛來亦偶然事死如生莫言孝幾
曾廬墓過三年

庚午三月初九日寒食有感

祭筵跪拜膝難擡連歲何曾上冢來老子七旬看又過幻身多病
復相催人閒願棄姑云耳地下從遊亦壯哉寒食江村舊行路道
旁相弔總悲哀

連日食粥兒輩愠見示之以詩

鈔書鐙下語吾兒歉歲艱辛汝未知坡老忍飢常并日少游厭粥
亦多時但令後世師吾儉深怪諸人遺以危天意從今吾儘解窮

人大抵欲昌詩

耳聾二首

幾年本分做家公雖是癡頑幸不聾何必張皇驚鬪蟻更須辛苦
望攀龍溼窗暗想催花雨開戶遙知戛竹風問夜何其將夜半元
來野寺已鳴鐘

血氣衰微性不靈非非是是幾曾聽胸中不著許多事天下本來
無正聲但覺颼颼戰風雨誰知兢兢震雷霆先生耐靜坐終日怪
底作勞吾耳鳴

齋科詔使臣索詩

紫泥詔下九重天文治初興正急賢草木輝光霑雨露鳶魚鼓舞
樂天淵雲衢接武懷新渥雪案潛心理舊編禮樂三千攄素蘊丹
墀他日聽臚傳

贊楊子裕中丞

堂堂四世三公後今日乘驄出案臨坐上即時聞減樂袖中雖暮

不懷金官民乘訪皆公論獄訟平成有恕心古柏臺邊霜氣冽肯
分春意到寒林
贄允端木二首

漢家陵闕已蒼煙魯國靈光獨巋然衛玠音聞永嘉末陶潛詩著
義熙前可憐閣下投幾死不及車中寢獲全范榮寄語牙郎莫酬
價匱中韞玉可求旃

萬里梯航走貢珍乾坤無地著孤臣湘江空記庚寅渡石壁曾題
癸巳人國士猶嫌先事范仙家莫問幾經秦願提草履從君後煮
茗寒泉代拾薪

代上樂平傅知州初庵

一代風流獨老庵再扶道脈起東南家聲可與諸洪繼易學會同
小阮參畫錦羨君榮世胄寒氈容我坐清談願爲藥籠中間物才
匪芝苓愧不堪
壽常州路達嚕噶齊

蓬山閣上冠羣賢出擁朱旛瀨水邊但看兩州歌善政宜膺多福
享遐年當生自是長生佛未老應爲不老仙欲就瓣香稱壽去梅
林一夕漲江天

壽與可錄判

濯錦綵媚誇最勝子昂太白記前生一川風雨睡正熟千頃波濤
心不驚手試功名棊勝負眼看富貴槿枯榮壽杯肯向人間飲攜
傍蓮峰玉井傾

壽陸雲道判

誕日曾生陸地花關尹喜生時雙鸞扶下五雲車安期共約遊三
島方朔應畱醉九霞盛集儒流勝仙侶多培陰德種丹砂冷齋書
客來稱壽自笑東風兩鬢華

史藥房壽與東坡同日

日月同生豈偶然聲名不減雪堂仙岷峨西去八千里蘇史相望
二百年赤壁舊磯如昨否李生新曲至今傳祝公壽比南飛鶴共

結梅花歲歲緣

壽陸義齋二首自巳九月
五羊歸

歸棹石門江水長肯畱一片廣州香不須人祝千年壽但願公流
百世芳長侍潘輿游故里勝持漢節落南荒芙蓉金菊秋風逕好

和陶辭引玉觴

綠髮仙童馭彩鸞九秋彌節下人閒明分月影山河動清入霜華
草木寒已報除書來北闕不妨拄笏看西山霞杯淺注黃花酒畱
取餘香晚節看

壽李侍郎母

雙成遙下五雲車獻壽仙杯吸紫霞愛惜孫枝長萱草摩挲老樹
著桃花斑衣就養榮三釜錦誥分封備六珈他日肩輿扶上殿侍
郎正踏相隄沙

寄戴帥初先生

詞章科目溯當年璧水名流孰子先杜甫生逢天寶末陶潛空憶

義熙前明庭結綬懷新渥暗壁移燈理舊編約對青山譚出處一
冬澗雪長新泉

和陳無逸見贈草堂詩韻

綈袍誰念故人寒轉徙蕭然老伯鸞幸喜雲山無屋礙始知天地
出門寬悠悠歲月蟻旋磨落落功名魚上竿金谷已無歌舞地朝
川猶有畫圖看

郡幕請講書和藥房先生韻

不為祁寒暫輟冬肯移蓮幕下芹宮深青豈必從藍出美玉何煩
就石礱殘雪五更侵几白一鐙深夜照書紅他年共赴長安召正
恐諸儒卻誚通

和蔣公秉思歸韻時寓普
明後寺

不愁世路大行難自歎行藏愧孔顏借榻寺中分兩寺白樂天詩
兩寺元從
分一寺思鄉山上又重山淒然碧草天還遠輸與白雲相對閒我亦
天涯流落客何時同賦大刀還

和郭有章見贈韻郭宣城人

敬亭山屬謝家詩太白重來又一奇天既生才宜用世士多有志
不逢時屠龍合讓高人手捫虱纔堪童子師大廈支顛要梁木獨
甘杞菊老天隨

和陸振之見寄韻

日長不廢讀書功我與宗人老頗同病起自羞黃面老興來人笑
白頭翁剖瓜未信能祈巧結柳終須學送窮尊酒論文定何日碧
雲暮合憶江東

代和翟知事舟中寄登光陽樓詩韻

登臨送目際天涯人物風流勝永嘉已泝清流乘畫鷁尙畱醉墨
看塗鴉長空黯淡吹雲葉別浦微茫蹴浪花老守江城閒兀坐秋
宵短夢苦思家

和劉濬見贄韻

踽踽涼涼莫我知讀書漸懶任嘲師荷鋤亦欲耕絲上把釣因思

入漢陂始讓著鞭先士稚何須舉扇障元規巴人白雪難同調今
古應無兩子期

和鄧善之寄王一初并柬見韻

抱拙投閒計未疏但看歲晏復何如丹山碧水吟招隱白髮蒼顏
賦遂初逸少幽情誰與暢元龍豪氣未全除柴門有客迂雙屐何
不相逢許史廬

和戴帥初寄詩韻

詩云清江一日走千艘獨有閒仙不喜遊
幾處白雲思暮合數行紅樹又秋高云云

入海逢車陸用艘仁人不遇歎遊遨登龍有意師元禮刻鵠何心
效伯高每笑囚山非國語絕憐投閣反離騷此身幸免官驅使兩
手猶能把酒螯

次樊晉山長贄見韻二首

閒戶柴車久不巾但思言行謹書紳可憐麋鹿山中友不是麒麟
閣上人作賦也應曾感舊爲師那敢望知新老饗誰獻先生壽自
酌蒲桃舞鬱輪

我羨君才桂一枝天門步擔束書歸藥方按古藏芝籠花樣翻新
織錦機不恥緼袍身自貴能知璞玉世尤稀天寒野曠來時路一
笑應疑吾道非

次韻袁良所投贈

意氣冲霄義薄雲白頭傾蓋卽相親耳邊久不聞瑰論眼底初驚
見玉人歷代文章空自變致君風俗幾時淳世閒別有經綸手不
屬柴門老病身

次鄭前山絲字韻

人笑學官如兔絲出南史誰能千里遠尋師歸田便覺知機早□□
應嫌見事遲縱欲著鞭何所往奚須按劍復相疑世人多享容容
福白璧從來不可爲

畱別王伯洪平章高顯卿左丞

幼從翰墨場中出晚見車書寓內同四十年前沾雨露三千里外
犯霜風蛾眉共妒嬋娟女鶴髮誰憐矍鑠翁回首束書歸舊隱江

南筍蕨滿山中

別管韶夫

胸中耿耿挾孤征刺口逢人輒論兵投筆少年眞燕頷著鞭中夜
忽雞聲功名險處方成就節義窮時要講明別有中庸書一卷勸
君西謁范高平

送元帥移屯太倉

十乘元戎又起行澄川老稚送傾城北風吹轉旌旗影東海權騰
鼓吹聲桑麥千村無吠犬波濤萬里息奔鯨新年鳳詔催歸覲殿
內金甌覆姓名

送陸誼齋按察

使星出照三吳地原隰馳驅遠有光鷹擊何如學鸞鳳狐多且莫
問豺狼懷金昌邑難汗震置酒清和反怒章今日故人無請託他
年鴻燕勿相忘

送葉敏卿提領

牆東老檜屋三間几案亭亭背遠山時事浮雲蒼狗變機心滄海
白鷗閒歸與乍出紅蓮幕行矣催歸玉筍班老子婆娑今得計底
須坐客唱陽關

送嚴簡卿之燕爲司徒掾

漢儒多辟司徒掾屬雖卑地望高聞有袁安在公府可無陳寵
作辭曹漢陳寵少爲郡吏辟司徒鮑昱府是時三府掾屬專尚交
游以不肯視事爲高寵獨勤心物務昱高其能轉爲辭曹
臺落日射征袍

送劉侯之官吉州

暨州美政不三年江右遺民借二天阜蓋朱旛新牧守青原白鷺
舊山川邦衡奏疏雲中有永叔詩章洛下傳故里諸孫無恙否下
車第一表先賢

送侯仲達安豐之任

江上故人今送別淮頭往事獨淒涼陂成孫叔能強楚城破劉公

不負唐千載與君期事業一區憐我老耕桑升平幕府應多暇書
問時時遠寄將

送州官解任

小郡凋零不可爲長官賢厚莫能欺政聲鄰邑皆傳說心事同僚
盡得知堪笑青蠅工點汙敢將白璧強瑕疵清時公論終難泯棠
愛空畱去後思

送張文友州判

太息君侯有祖風栖栖五載簿書叢功臣昔繪雲臺上循吏今標
漢傳中綠水江風送行色紫荆關月照孤忠預人家國非吾事但
喜詩書氣味同

送邱景唐赴安豐教

宗卿宜撫
樞密之孫

元樞出督宣威地名姓江淮草木知今見聞孫騎款段去爲博士
擁皋比詩書澤遠真難繼功業時來不可爲往事百年無處問慶
豐亭下稻連陂

送朱伯海入京

燕黍寒生春未回，
可堪早別故園梅。
新豐斗酒馬周去，
京兆束書韓愈來。
賦就不須呈狗監，
勅除先合拜鸞臺。
青雲附驥非吾願，
自守書鐙撥冷灰。

送朱鶴皋入京

故人天上調金鼎，
應念先生苜蓿盤。
博士不煩重講席，
拾遺無復歎儒冠。
蓬萊海闊還須險，
太華峰高不道寒。
茅屋三間老書客，
逢人懶問日長安。

送王君實遊金陵

破氈吟雪擁清寒，
有客虬髯急扣關。
歲月蒼茫千里暮，
乾坤博大幾人閒。
依來自許風雲際，
邂逅相逢草澤閒。
西上秣陵春未半，
白鷗黃鵠看江山。

送李義夫出遊二首

與君卍角志相期，
歲晏行藏各有違。
老樹晚花空自媚，
秋林病葉

更先稀。時情淡薄元無味，
世路艱危總是機。
門外北風吹自裂，
旅人瑣瑣欲安歸。

少年有志東山臥，
晚歲方圖北海遊。
餽口飢靈甘半菽，
挂胸氣尚食全牛。
問唐元振今誰在，
欲趙平原何處求。
赤白洪崖兩相厄，
不妨詩句各風流。

送魏叔華歸杭州得行字二首

青山出郭遠，
相迎潮去潮回客子程。
門外送車今幾輛，
筵中祝酒已三行。
對牀有弟酬佳約，
擁髻何人訴別情。
桂樹結花當灑掃，
重來曾指白鷗盟。

杜康橋下水如傾，
九里岡頭路轉城。
風雨小樓清夢遠，
山河古道幾人行。
別懷漸覺傷安石，
祖席何曾傲正平。
是日饒不至珍重去逢南國友，
爲言白髮老書檠。

饒劉繼明西歸同知子

人生有三事，
如一父子師友皆人倫。
入向親闈奉甘旨，
出當書案

服辛勤老成識見無如子少壯功名肯讓人老我卑枝棲鷓爵仰
看黃鵠上青雲

送留中齋孫歸三衢

百花頭上和羹手乃祖聲名似孝先太息北朝開府老真成故里
爛柯僊慶流家嗣承先澤學到孫枝又一傳野叟臨歧無別語勤

修世業復青氈

題桃源手卷武陵今鼎州常德路桃源山在縣北二十里古述無復遺或謂此記淵明寓言即義熙題甲子恥事二姓

種柳栽桃總是春興亡千古一沾巾只評隱者非仙者莫悟秦人

即晉人年號記曾題甲子兒孫肯使識君臣南陽高士空遐想不

向柴桑去問津

題三洲詩卷

潮擁寒沙匹練長東陽人物老江鄉藕花秋晚吳霜落杜若春深
楚水香閒對漁樵談治亂貪看鷗鷺失興亡無人會得乘桴意東

面區區歎海洋

題陸義齋雙蓮圖

紅粉香中雙並蒂碧絲藕下暗連株主人一笑偶然爾客子競誇
前所無堂上墳簾兄友弟房中琴瑟婦隨夫君家和氣濃如酒此

即雙蓮瑞慶圖

強南坡自作墓銘生求挽詩

年光催客過郵亭八十餘翁尚典刑見說近成遺老傳未當上應
少微星履香竊笑空題墓寶玩何須自乞銘今古達觀唯一士山
童負鍤醉劉伶

挽吉州劉總管

畫戟清香彼一時歸舟素幔不勝悲墳成共負撻為土堂在空留
蜀郡祠亂起赤眉徐自定憂侵白髮已先衰平原歲晚多賓客泉
下難酬國士知

挽李宣慰

公騎箕尾上秋旻忍見龜趺對石麟盛德固應祠百世陰功何止
活千人壯圖落落心空在華髮蕭蕭事轉新耆老凋零關世運可
能知己獨沾巾

挽晉千戶

燐草原頭十七霜宛邱改卜日辰良可憐先軫如生面疑住靈均
不死鄉杯土豈能埋宿憤遺民聊與發幽光護喪諸子皆稱孝萬
室他年置墓傍

啟墳面如生

挽唐可竹

亡宋兩魁鄉薦歸附後漂水丞終于燕

穿楊折桂黃梁夢庭下哦松白髮秋興廢沙關千古事榮枯肯爲
一身謀江南有客朝金闕天上無人記玉樓丹旆西風范陽路行
人回首憶林邱

挽孫石山二首

壬辰年卒

今年星度歲爲龍掩袂竟嗟吾道窮正始遺音從此絕貞元舊曲
爲誰工飾棺不待百年盡隱几元知萬事空里有水心銘筆古宜

書潛德賁幽宮

榮華露槿落紛紛蒼狗依然是白雲荆渚止稱前進士霸亭不識
故將軍人間無樂徒勞子天上求文卽召君短些西風將淚去隻
雞他日酌秋墳

弔李古巖

堂堂山立萬人英一夕霜風玉樹傾公去隱然關世道客來何止
哭交情安知死不如生樂但恨才難與命爭幸喜肯堂丹雘手隴
西依舊振家聲

挽闕南夫

號實軒乙巳年卒

惡夢無端歲在蛇先賢遺路重堪嗟粹然踐履終須實老矣婆娑
兩鬢華不見鯉庭人獨立忽驚鵬舍日西斜窆碑好爲書潛德窮
巷誰尋伴作家

挽陸義齋二首

四持憲節遍南方屢表陳情返故鄉殊俗今猶歌德政老天胡不

愛忠良山空虎逝狐狸出春去花殘蛺蝶忙五十人生不稱夭獨
憐華髮在高堂

生平意氣每相期歲晚行藏各自知見事略同因撫掌憂時不語
共攢眉闔棺已矣公何憾聞笛淒然我獨悲回首秋山寒雨外青
松滴淚作枯枝

挽東平張彥明

女事曹安卿

夢覺黃梁僅一炊人生適意不多時杜陵老病親桃竹白傅清閒
憶柳枝有意出山尋樹檟傷心歸櫬賴門楣秋風淚滴長江水遙
寄東原薤露詩

挽黃子高

場屋初興選異才先生闊步上金臺蓬山渺渺仙舟隔泮水悠悠
講席開同是甲辰雌正伏胡然庚子鵬爲災天寒病叟那能出一
束生芻寄淚來

挽邱景南

紫荆庭下列三株十五年中次第枯餘慶後來英俊有老成先輩
典刑無每懷素志甘瓢飲不覺長生要杖扶頭白少公門下客酸
風吹淚灑晴塗

蔡梅邊挽詩二首

代作

尊酒吟梅憶舊遊忍聽笳鼓咽原頭曾廬柏下三年墓退臥花間
百尺樓所居有樓淮海壯心空落落山林晚興寄悠悠寒窗寂寞留
孤月勸孝坊前客淚流

憶昔艱難共避兵轉於貴賤見交情長江一水分南北異姓兩家
眞弟兄回首忽驚人世換傷心敢負歲寒盟空亭花月如春夢惟
有清溪一帶橫

葬在清溪醉月坐花亭名

挽張州尹夫人

新頒五色金花誥彩服兒孫正滿堂不見魚軒隨五馬空令鸞鏡
照孤凰車中鬢老愁潘岳案上眉低憶孟光流水無情飄素幔涼
宵燕寢獨凝香

牆東類稿卷十八

牆東類稿卷十九

五言絕句詩

絕句三首

車薪勝杯水與羽重鉤金物理原無定權衡只在心
買絲繡平原儼金鑄子期君子病無能不病人不知
杜欲誅雲師韓將訟風伯水旱不由天那是詩人責
雪夜不寐偶成短句十首用渭北春天樹江東日暮雲爲韻

大夫慎出處功成乃身退古人夫何如八十釣清渭
四時循化機萬物隨動息眾星分熒熒天運齊拱北
縞素製野服誤染京華塵舊業在何處梅花江上春
男兒不得志壯心惜徂年長空起鵬鷲目送入寥天
布衾生淒寒夜夜夢歸去心恐秋風生摧殘紫荆樹
吟苦不成寐寒窗凝夜缸千古誰知心遙遙賈長江
此身如斷蓬飄蕭隨北風錢塘一望地家住西湖東

瓶集十九
客慮千萬端長吁愁不出誰能事低首揮杯送白日
幾欲膏吾車老眼不識路弟妹今何之蕭蕭白髮暮
昨日家書至慰我久離羣遊子眼欲斷日日望白雲

東風

東風何太急日落黃塵起篝燈吹欲滅驟雨打窗紙
秋塘觀魚

野塘落芙蓉下有潛鱗躍漁多罟日深圍圍方是樂
戲書所見

雲英捧玉液真是裴郎偶不知幾萬錢買得玉杵臼

送祝君晟湖州提領案牘

幙府今何處青山水遶城烏程有美酒還肯餉春耕
題李義夫無鎖亭二首

清風四無邊曠然此君宅可不問主人不可容俗客
昨日蒼溪叟曾來斫釣竿山童尋鶴去失卻報平安

題畫二首

雲巢八十翁觀化得三昧無聲涼月下適意芳草外
物物具天機緣何紙上生有時挂素壁自動亦自鳴

題畫春景

青山多喬木柳枝低婀娜春風在毫端高遷無不可

題月汀圖二首

太陰水之精浴水光愈潔常怪市中人不識沙頭月
露垂蘭葉光風翻藕花影灘前白鷺睡夜半莫搖艇

題畫梨花

淡容露如洗生色春欲動紙帳小屏低同入梅花夢

題碧桃手卷

爛枝空有色飛羽本無情獨立春風裏如聞三兩聲
寫竹

傳神疑有月著色淡無煙此是詩人筆胸中有渭川

題南宮子中畫鶯
金衣何璀璨飛向垂楊樹久立卻無聲東風吹不去

題畫白雁二首

蘆花秋半黃三兩下寒塘北風正蕭瑟書遠不曾將
未曾至雁門安知食雁美若讀潛夫論當不保此紙

六言詩

赤壁圖二首

公瑾子瞻二龍文辭可敵武功卻怪紫煙烈燄不如白月清風
烏臺夜雨傷神赤壁秋風岸巾此老眼空四海舟中二客何人
題蕭照山水

閉門十日風雨神遊湘浦峽川樹影分開草杏雁聲吹落漁船

王黃華山水小景二首

試問滄洲漁叟長松山崦誰家終日拏舟不語江風吹老蘆花
此紙無脂粉氣之子有山水淫當時以意摸寫今我以目登臨

題鷹捕雀圖二首

其一已擒其一
驚去鷹復回顧

一雛已飽毒手反顧又欲其餘大貪得隴望蜀小貪取熊兼魚
死生命判須臾一去一不得去兩三竹葉成叢被毆復向何處

題戴嵩牛圖

隴上躬耕力倦歸坐茅齋展卷耳邊如聞笛聲卻看牧童不見

七言絕句詩

讀史六首

逐鹿紛紛盡向秦東門牽犬亦無人月宮穩上青冥去桂樹秋風
老此身

暮年百事已心降牀下無人拜老龐病眼欲開還又閉偷看日影

下西窗

曠懷雅思人人有濟世經邦事事無終日醉眠呼不醒明朝典午
代當塗

廣陵琴與山陽笛哀怨千年尙未平正始諸賢零落盡山王去作

晉公卿

曉口嵩少玉嶙峋枉駕應憐處士貧令尹若能爲保障長衾盡覆洛城人

司徒太尉總三公奢儉由來性不同金帳羊羔酣未省誰能僵臥里門中

偶成

奸雄往往墮危機成敗安能論是非空笑狂生投益智絕憐老母遺當歸

偶書

憂時耿耿丹心在無事悠悠白日過萬里山河音信少一春風雨悶懷多

舊題

賸得清明一半春蜂衙蝶使往來頻東風自動鞦韆索不見海棠花下人

戲狄懷英

花樣精神月樣妝妖魂不敢近忠良如何鳳閣平章老卻事宮中嫵媚娘

己巳新春二首

鞭春已罷燒鐙近十日西風未轉東料得化工無別意祇因不放小桃紅

一株梅

山村示暮春三絕句和韻

懷哉春晚故山薇冉冉江雲日暮低爲問柳橋看燕舞何如松嶺聽猿啼

樵兒拾樵不畏虎隔溪看花如看霧鷓鴣聲在柘岡西落日暮鑱下山去

畫簾朱箔燕爲家青草門庭只產蛙一樹櫻桃紅半落園丁愁殺

雨如麻
王祁伊中秋不見月四首

秋空碾上一輪冰積雨連宵洗更清縱有浮雲容易散吹開不待管絃聲

裏將來
家家望月試停杯怪底濃雲撥不開身入廣寒人不見卻將袖裏

中秋萬里共陰晴曾記坡翁最善評誰信九霄風雨外羣仙正賞月華明

開元以後可堪憂秋雨淫淋稼不收此際霓裳歌一曲君王正在月宮遊

臘月二十六日立春
隴梅未寄江南信鄒黍先回燕谷春忽憶少陵巫峽句菜盤思見

玉織人
丁丑元夕

入夜不聞簫鼓聲千門月色為誰明無端邏騎階前過錯認咸家

樞馬鳴余居興起
潛姪相鄰

石湖畱題三絕
仙子驂鸞不可呼故園花石久應蕪不知綠埜何人買試問千泉

有子無
高築詩壇據越城醉呼楊盧主文盟至今月下蒼苔石時有先生

杖履聲
當年彬父遣詞臣列戟旁觀色怒瞋穀水曾無歸壁日稽山已有

摸金人
望三峰
筍輿伊軋下山田遙指三峰返照邊安得肉身生兩翅霎時飛過

此山前
上大峰四絕句
懸厓石磴刷苔青空谷無仙鬼亦靈聞說遊人多好事誰能扶直

半山亭

勢傾將壓

風吹天朗見秋毫足力窮時所歷高老子何曾煩一步輿夫攀陟不辭勞

羊腸九折路盤嶇不覺騰身一太虛失腳從知高處險西風斜日早回車

一家兄弟入仙門誰把名山鼎足分我讀儒書知長幼辦香先禮大茅君

露筋娘子廟

玉真仙子雪爲膚枉被羣兒識塞酥寂寞扶風三尺土可憐香火至今無

桃源縣

張家橋西車馬塵北風刮地眯行人籬落枯桃三五樹不應此地可逃秦

文安縣

平生知己富歐韓辛苦修書博一官自是朝廷重科目且教主簿到文安

夜宿何莊唐主事宅

扶風豪士不知名尊酒相逢意便傾爭似何莊今夜宿梅花燭影照三更

夜宿范以善提舉雲林清遠風大作偶成二絕句

猿啼夾澗聲逾遠鶴啄荒苔跡更清身在千林頭上立忽從腳底白雲生

雲峰頂上玉仙家誤入修廊一逕斜夜半月寒風力勁滿山松影走龍蛇

臨沂沂水道中塵沙眯目不行聞東北有溫泉卽浴沂處不及往臨沂以北沂水東行人障袂塵沙中縱有溫泉能自潔零壇安得可乘風

除夕二首呈北溪

臘雪窮途三月中明朝老鬢又春風遙知兒女團圓處飲徧屠酥
憶乃翁

杯盤今日偶相逢客路漂漂過一冬爲問玉堂春帖子不知學士
有誰供

清明日泊舟甲馬營

細柳東風甲馬營鞦韆花下笑相迎舟中自有傷春客暗數歸家
幾日程

清明

花開花落總無情贏得詩人百感生今日東闌看梨雪坡仙去後
幾清明

宿黃村上人索詩二首

塵沙終日意昏昏落日炊煙又一村客子倦遊求止宿主人搔首
更無言

黃村落日下山低宿鳥歸林亦倦飛夜半驅車投北去誰能慷慨

泣宋衣

入京二首

觚稜棲雀五雲深此日江湖向關心朽骨不堪重拂拭涓人莫枉
費黃金

手攜布被入關中頗似菑川六十翁未必漢廷推第一不須側目
事轅公

舟中追和遜卿早春卽事十首

柳色黃金醮碧沙隔溪遙指四娘家故年春事如今晚可見東闌
芍藥花

清江漠漠漾晴沙門對青山買酒家牆外一聲金彈子流鶯驚起
落庭花

莫惜青衫汗酒痕欲將遺恨寄芳尊清明客裏恩恩過不記桃花
笑倚門

草色青青沒燒痕山川滿目酒盈尊只愁逋客回家日先被春風

緊閉門
 乍別親朋似久違
 西風塵起染緇衣
 不須杜宇聲先勸
 如此江山胡不歸
 壯圖落落與時違
 不信經綸起布衣
 縱使鵝魚從北化
 也隨烏鵲向南歸
 客至從容奉笑談
 晚知蔗境味尤甘
 曲江進士題名徧
 安用山人起水南
 虎溪何必與禪談
 惟有東籬菊味甘
 束帶肯為兒輩屈
 悠然興在此山南
 科斗臨池學篆文
 燕雛帶雨掠香芹
 春闈應恨歸來晚
 南浦當時錯送君
 草堂未可便移文
 自煮清香碧澗芹
 更向白雲深處宿
 山頭回首謝諸君
 賦歸四絕呈句容諸友

興盡歸期漸有涯
 夢中昨夜已還家
 兒童笑引池西去
 菡萏猶餘一朵花
 故里青松百尺強
 亭亭三徑儼成行
 東籬雨後無人葺
 舊菊多應一半荒
 我與茅君宿有緣
 四年五度過山前
 元符直下崇禧路
 回首三峰意愴然
 一見諸賢益便傾
 秋風猶動故鄉情
 餘生無復重來日
 再世何當結弟兄
 題禹廟
 來尋禹穴何容易
 卻上龍門得許勞
 擬借梅梁浮海去
 坐登三級浪頭高
 仲冬雪夜偶書三絕句
 城樓戍鼓盡三更
 鐙射齋窗一黍明
 窗下有人勤不寐
 隔牆猶聽讀書聲

擁衾危坐夜沈沈門外誰知雪寸深掩卷不言空太息靜中忽見
古人心
長廊風緊雨冥冥花落寒燈酒半醒但覺晨光何太早不知飛霰
集窗櫺

諸生和韻復吟三絕

荒城戍卒打三更道上無人天未明一似銜枚蔡州去只無鵝鴨
混軍聲

猿啾鬼哭杳冥冥夜半何人弔獨醒歌罷離騷心正苦陰風吹雨
響疏櫺

地鑪無分熱香沈畫盡殘灰夜正深窗外梅花消息動要知子半
是天心

自笑
既聾不用誇三耳純白安能辨二毛自笑先生書案上又將論語
教兒曹

丁卯新正紀懷四首

懶將詩句上桃符柏葉椒花一例無卻笑簡齋元不簡舟中猶自
飲屠酥

土潤耕牛不受鞭風和花鳥各欣然老人猶記兵戈日自後昇平
五十年

紛紛兒女競新年老去思親獨愴然墓上只堪供灑掃無由綵服
拜堂前

魯史曾書雨木冰坤爻切切戒陰凝衡門空抱憂時志無奈華軒
盡日乘

窺園
先生日日好窺園學圃工夫細討論買李不須先去核耘瓜只恐
誤傷根

井竭
坎蛙曉渴上苔闌石甃泥渾底欲乾焦稼不爲簞食計一瓢飲水

亦良難

啟山掃松

一妻一妾閉泉扃老柏蒼蒼蔓草青我肯墦間求厭足魂歸不必

病中四絕

南山處士老尤貧頗恨故交無一人若使知心得良友更因多病

轉相親

老去無憍病轉多櫻桃楊柳奈情何故人又比佳人薄莫怪門前

雀可羅

落葉蕭蕭壅樹根疏林帶郭半疑村臥聞車馬牆邊過無事呼兒

早閉門

浪說蘇公久已仙豈知翁自厭餘年雪堂二客能相從姓氏當時

惜不傳

追和四絕

文士多嬰病與貧浩然東塾卽其人唱酬從此詩筒簡炮炙時於

藥裏親

舖餒糟醅醉者多獨醒無奈眾人何窗寒細嚼離騷語遺恨千年

弔汨羅

三十尋思擬學仙蹉跎已過古稀年一生只作邯鄲夢枕上奇方

祕不傳

臥看山雲起石根意行隨犬至前村廛居自是無人識何必移家

上鹿門

又口號四首

謹按此詩壽陸義齋作時乙巳九月
前有七言律詩一首編入十八卷

洛陽亭下昔埋輪當道豺狼不避人
昔日黃花故園酒獨攜野鶴
伴間身

仁挾翔風勇駕霆皇華使者出祥刑
福星一夕遷吳分卻向龍山
見壽星

華堂捧勸紫霞杯紅粉回頭御史來
直道素知嫌嫵媚羞將白鶴
放籠開

幼安伯可號文雄詞壽秦韓枉自工
賢相肯交窮處士何如魏野
祝萊公

贈松窗
故交皆疏柳子厚新貴不識王元之
袖中刺字已漫盡一童猶負

囊中詩
贈復初二首

昨夜春風到柳枝客衣偏愛薄寒欺
囊錐穎脫無人見欲繡平原

未有絲
有客袖中懷短刺何人門下曳長裾
每評陸子毀茶論大勝顏公

乞米書
盜華張尉衛輝人也因寇失官妻子為虜
行乞歸鄉贈以二絕句

葛藟絲絲長道邊獨行踽踽亦堪憐
邯鄲正近君鄉里好借仙翁

一枕眠
南來憔悴一身存歸雁哀鳴久失羣
莫怪夜行人不問形容豈似

故將軍
桂松巖以子平星禽二術推人多驗戲贈二絕

十二支神配木干此專日主論財官
豈無辭祿安貧者說與先生

子細看
異類於人總不干止聞列宿應郎官
區區女蝠兼危燕卻與蛟龍

一例看
贈星禽趙顯微詩三首

顯微元是紫微仙
天上星辰手斡旋
爲向人間多漏洩
謫下茅峰五百年

莫把行藏問斗牛
年將八十更何求
願言奎宿長明健
文治從今徧九州

奎宿如何號木狼
尾箕虎豹若爲詳
獸心人面凡皆是
瑞物如何無鳳凰

和史藥房三絕

莫倚承恩賦上林
記曾薄倖託琴心
白頭又欲輕桐背
令蹙山眉作苦吟

出處何如漢二疏
返耕聊以遂吾初
虎頭未可輕搖筆
牛角何妨且讀書

春被山巔與水涯
書供物料入詩家
陸劉近世升沈異
一爲梅花一杏花

和張寶石絕句四首

江梅歲晚獨清妍
南國相逢亦偶然
料得知心有寒月
不消重霧與輕煙

平生夢不到黃扉
安得京塵染素衣
只把一竿江海去
相看鷗鳥亦忘機

十年講習坐無氈
盡把行藏付與天
策馬已甘之反後
著鞭莫近祖生先

兀坐書林閉董帷
時尋佳句寫烏絲
兒時論語今忘卻
且讓安昌作帝師

山村贈禮敬龍澤上人
詩有幾年不蹋澄江路
耆舊唯存陸子方
之句和之二首

西抹東塗銜一鄉
阿婆羞憶少年妝
如今閉戶無人識
旋學仙翁卻老方

西山爽氣入吾詩
拄頰含毫有所思
欲把求田語立德
莫因學圃笑樊遲

次伯機絕句

梅天風雨一江寒溼卻江頭舊釣竿自著漁蓑沽酒去路逢賈客
問長安

畱別袁伯長待制凌德庸少監周南翁待制諸公三絕句
待詔明廷百有餘一人釋褐向江都諸生對策無奇語田實何曾
不喜儒

書生骨相太迥迤地位還須有福人老我終身友麋鹿看君他日

上麒麟

猛猛虎豹守天關月殿蟾宮不可攀歸路春風無限好一聲啼鳥
破青山

絕句畱別善之仲實併呈松澗雲仲無逸四首

今夜征帆淺渚邊何時尊酒落花前白雲繞舍歸心切不爲春林

聽杜鵑

手拈花草弄春愁兒女安知稼穡秋山北山南游未徧歸歟且復

事西疇

江上春雲生暮寒故城回首離長安殘桃賸柳應無分畱與諸君
取次看

老檜榮枯不計春好花開落止經旬莫將衣翰誇餘子共擬勳名
及古人

古意四首寄張可與孫晉卿

長安城頭紅日斜王孫金彈打烏鴉寄聲翠鳳穿雲去霜寒莫戀

枯桐花

長松百尺蔭官街街吏斧鋸充官柴高寒自是飽風雪歲晚只合
居窮崖

老翁持鏡向市賣銅光的皦秋水清醜婦鑑容驚墮地想渠嫌殺
太分明

狡兒狹徑礙樵枝樵兒格鬪暮不歸於菟一聲嘯篁谷兩兒驚散
走如飛

夜得二絕寄子華

送客征衫秋八月懷人病枕夜三更牀頭稚子呼不覺窗外瀟瀟風雨聲

雞鳴風雨思君子雁過瀟湘憶故人別去情懷渾欲醉夢回詩筆已如神

絕句二首寄紹堂求巧石

籬根怪石起層雲淺帶春泥碧蘚紋乞與詩人時醒酒也勝豪奪任監軍

幾年石友臥蒼苔曾受南宮雅拜來老子暮年行腳倦只宜窗裏看崔嵬

送唐孟方教授三首

泮水三年惟飲水不知芹藻味何如羣鴉無故爭桑椹挾彈何人莫問渠

禦兒溪北浣征衣重拂蒼苔舊釣磯有弟對牀思久別呼童置酒

話遲歸

城東老圃舊書生緊閉柴門懶送迎獨袖篇詩與君別相看白首不勝情

送李義夫出遊二首

梅花卸玉春寒淺柳色描金雪意消老子偶然詩興動又挑行李過溪橋

三千丈髮從渠脫九十日春須我遊出卻草堂三五里囊中無得一錢畱

送吳仲魯回烏江二首

易學
老人白帽子青衿二水相滋兌澤深學易已隨丁氏去金蘭何日慰同心

黃田西望歷陽城風水蕭蕭數日程紙上陳言刊落盡滄浪時聽棹歌聲

送畱君玉高雲卿自江陰遷松江四絕

二君才幹俱優裕數載相從意未休短棹西風吹過柳相思霜月落南州

江浦買鱸秋正美山亭聞鶴夜尤清送君此去因懷古海水東來意未平

老我卑枝甘伏鷄羨君喬木又遷鶯清平官府無公事分我絲蓴一箸羹

暨州風土今非昔安得珠犀賈客船莫笑歸裝無一物江頭魚蟹亦論錢

鑒止堂

流水涓涓止水停要令漱玉結層冰深溪不汎桃花出誰識仙源在武陵

西苑

雪花翦白忘安蒂簡文詩雪花無有蒂霜葉彫紅不戀枝爭似隋家宮樹上四時錦綵不曾離

邱莊多稼樓二首

扁庸田僉事所書

樓上西風埜望時冥冥禾黍沒高低勸農使者來行水還凭朱闌認舊題

萬畝耕耘卒歲勤可曾一飽慰農人催租令急如風火輸入官倉化腐塵

嘉客泉二首

幽篁夾道少人居山骨清寒草木疏泉見客來空自喜春懷渺渺正愁余

一飲懷金出嶺南廣東廉泉蓮花峰下絕清甘廬山廉泉我來欲與流泉約獨喜廉人莫喜貪

四時佳興題徐景陽園堂五首

溶溶川上花光午冉冉窗前草色春能識此中真樂處聖門只有兩三人

門前車馬客方散堂下尊罍酒半醒不信鏡中添白髮君山依舊

去年青

窮秋破屋檐頭雨殘臘征夫陌上霜公子閒居無一事可能憂樂
兩相忘

華陽洞口金泉水流入宮牆作小渠任轉秦淮出江去不應久住
化龍魚

半匳玉鏡照鬚眉長笑東坡與水嬉直下瑯然投小石一波先動
萬波隨

題園亭

把酒看花貧亦樂攜琴對竹靜相宜客來若問朝家事回首東風
謝不知

同善之仲實無逸共賦雪中香亭

冷雲低壓翠禽巢碎玉玲瓏不耐敲蜂蝶遲來採芳信暖風已逼
杏花梢

鶴皋詩為振之作

鶴鳴于垓婦長歎鴻漸于陸夫遠征何似山亭聞鶴唳迷人靜坐
月三更

劉澹齋求米舡謾賦二絕

文士清高數米顛蔡公門下詎能賢探囊萬一逢江盜錯認眞州
發運船

靈寶生平愛虎頭每傍戰艦繫輕舟晚無書畫眞無益洗手莫嫌
寒具油

臨山谷帖不似

會草華清妙入神涪翁以後更無人捧心終是西施好里婦何緣
輒效顰

危金僊示容齋清暉堂詩求跋洪景廬乃危驪塘之座主也因成
二首

卷中人物想乾淳老筆題詩意轉新卻怪洪楊交不合誠齋亦自
是詩人

清暉何處有園堂消得先生句發揚百世空留遺墨在後生併不識驪塘

題敬威卿參政贈許正卿鉞詩卷末敬公之章許卿之藝諸君發揮盡矣終以二絕貂續尾蛇添足乎

江左知名許世微公來示之衡氣機天下呻吟尚未息公持肘後將安歸

正人一脈係安危温公身事亦付醫此身强健無著處不如枕臥看兒嬉

題李兄課卷

集中有句儘堪傳一夢科名十二年音好空聞永嘉末命乖不過竟陵前

題趙子德修屋疏二首

公子王孫逞富豪連雲甲第競相高誰是錦里秋風客不辦三重屋上茅

袖有青囊號救貧如何無術自謀身道南大宅今安在欲向龍舒覓主人

戲題聽琴手卷

流水高山不用彈巴人下里眾皆懽只今何處求鍾子多向文闈作考官

題昭君畫卷五絕

當時隨例與黃金不遣君王有悔心近使來傳延壽死回思終是漢恩深

妍醜何須問畫工美人終日侍宮中奉春初計真堪恨欲望單于敬外翁

青冢千年恨不埋琵琶馬上幾時回宇文高氏爭雄日突厥柔然獻女來

已恨丹青誤妾身何須更與妾傳神那知塞北風塵貌不似昭陽殿裏人

嚙雪中郎妾不如脫身無計謾相於勸君莫射南飛雁欲寄思鄉
萬里書畫中有胡人射雁

題二喬手卷二絕

國色嬌嬌畫不如風流二壻盡消渠阿承醜女無人聘自挈衣裝
過草廬

小郎斫案怒生瞋亞壻提兵算若神借使橫江風不便可能銅雀
鎖佳人

淵明像

宋文心腹寄王弘來刺江州卻有聲不怪孤臣書甲子時時送酒
賞淵明

小銅屏鑄淵明歸去詩并坡和章以贈子華侑以絕句
五斗區區肯折腰眉山早計不如陶小屏一枕還鄉夢五柳門前

月正高

移居圖二首

潛天兩踐最窮研通老安身契是立偶向晴窗展臨本無人當日
扣龍眠

細君散髻抱嬰兒底事移家不皺眉有句曾嘲窮處士四婆元是
解吟詩

江陰有桃源圖方圓尺許宮室人物如鍼粟可數相傳有仙宿民
家刻桶板為之一夕而成明日遁去友人以本遺余戲題二絕

不是柴桑記裏來似傳晨肇入天台世間多少荒唐事何獨神仙
有是哉韓昌黎詩桃源之說誠荒唐

人說桃源是隱民神仙幻景即非真如何谷口漁舟路不許人間
再問津洪諸父詩得之如王摩詰退之夢得皆誤然余考之本記亦
有可疑如漁人回舟竟不能認前路後有問津者輒死桃源果在世間
何不可復見耶

題子昂學士小景
蕭蕭落木壞無枝冉冉細竹受風傲疑非松雪齋中畫似是唐人

望望詩

馬道士爲詹仲明作柳城春色圖城門外柳樹連隄桃花夾竹小
橋漁艇茅屋下有讀書人不知何處景也爲題二絕
渭城客舍柳煙遮漁叟桃源去路賒松竹林中讀書處一圖風景
屬三家

城外春風莖水渾橋頭雙槳下孤村柳桃紅綠撩人眼獨坐書齋
懶出門

題牡丹梨花手卷

沈香宴罷索人扶重向銀屏覩雪膚一笑不償千古恨玉環當日
倚闌圖

王隱齋墨梅

曾看月下挂疏影更憐雪後折橫枝逋仙此景真是畫王生非畫
卻成詩

題補之梅

含章殿裏雪中開曾共君王索笑來著在荒蹊枯竹畔可知准敕

號村梅

題扇有所贈

圓如寶月潔如霜素手輕搖玉體涼報道明朝秋節至婕妤無復
望專房

亭下玉蘭花開

初如春筍露纖嬌拆似紅蓮白羽搖亭下吟翁步明月玉人虛度
可憐宵

梨花

粉香初試曉妝勻花貌參差似玉真茅屋詩人嗟老去東風忽送
一枝春

枯松

誰見當年長髮鬚變成龍虎臥交衢雖然擁腫無人問投老猶堪
作大夫

鹿蔥絕句

丹葩信不類
萃蒿雨後常
抽綠玉條
此草豈宜充
鹿食瘦莖
卻比沈郎腰
沈約作鹿蔥詩云爾非萃與蒿豈充鹿食讒者取此詩何為得罪但此花丹色略有斑點似鹿紋所以得名非謂可以供鹿之食也

詩餘

點絳脣

情景四首

玉體纖柔照人滴滴嬌波
溜填詞未就遲卻窗前繡
一幅花箋適與何人手
還知否孤燈坐守漸入黃昏後

笑靨多羞低頭不覺金鍼溜
憑媒將就鳳枕回雙繡
月地雲階何日重攜手
心堅否齊眉相守願得從今後

永夜無憀更堪點滴聽簷溜
枕寒難就堆亂牀衾繡
人面桃紅還憶擎將手
君知否倚門獨守又是清明後

悶託香腮淚痕一綫紅膏溜
將身錯就枉把鴛鴦繡
柳帶青青攀向行人手
天知否白頭相守破鏡重圓後

前調

王仲謙席上歌者魏都惜求于華寫真為賦

小立娉婷歌聲低
過行雲住不勝珠翠玉面慵梳洗
除卻姚黃魏紫誰堪比
君描取卷中人美得似崔徽未

浣溪沙

次伯機

翠玉峰高鷺點明
縠紋波動鴨雛生
湖山宜雨又宜晴
越女蕩舟蓮葉碧
裴郎駐馬柳陰青
折花調客訴衷情

減字木蘭花
庚申六月三日同耶律君璋趙子淵兄弟避暑飲于玄妙觀之荷池君璋不飲命歌者歌以勸之
雙鬢聳翠低護金蓮裙
窄地鐵石心腸無奈梅花一點香
歌聲

梁繞流水冷
冷雲杳杳白髮劉郎對景須拌醉一場
前調
卽席贈歌者夏奴

香肌玉潤花前忽聽流鶯韻
移步金蓮斜轉清眸踞舞筵
困嬌無力蜀錦纏頭拌百尺安處奴鄉且住
容山過夏涼

阮郎歸

舟中賦所見

風吹一捻柳腰輕
春柔力未勝眉兒喜學遠山青
終朝畫不成
嬌滴滴笑盈盈
雛鶯葉底聲
花梢雨過夕陽明
無情漸有情

臨江仙乃坐客有出寵歌者主人舊所歡也

聽得雅歌珠一串颯然吹動梁塵尊前重見舊時人
主人情未重情重是嘉賓
飛絮落花無定在近前
遮莫誰瞋文園倦客最傷神
野亭何處泊空憶畫堂春

唐多令梅隱庵席上贈歌者

花下笑聲微鶯喉高又低怪穿花粉蝶成圍
唯有禪心清似水相對坐兩忘機
莫道絮沾泥狂風也解飛恨殘春九十將歸回首
陽臺雲縹緲愁薄暮雨霏霏

前調寄遠

明豔注秋波輕鬆縮髻螺怕逢人先斂雙蛾怯雨羞雲情未穩佳
會少遠離多
梁遠憶清歌蘭舟肯再過為他垂淚染香羅欲倩
鱗鴻將錦字知別後意如何

滿江紅送理伯雍同知改除轉運判官

雙檜堂深想前日清風猶在纜半載政聲傳播與人稱快
鞠草園

屏無滯訟憩棠田舍畱遺愛問方今循吏幾何人公為最
明而恕廉而介官易進身難退苦簿書叢委米鹽繁碎雁鴛自憐羣裏
聚龍豬不計兒時會望美人又向碧雲西徒增慨

前調贈歌者

兒女多情頗自恨風雲氣少春夢裏鶯啼燕語瞥然驚覺寸寸凌
波蓮步穩彎彎拭黛山眉峭似紅雲一朵罩江梅天然好舞腰
細歌喉巧錦茵褪梁塵繞更盈盈笑靨櫻脣紅小金瓊愛從心裏
換玉山偏向懷中倒奈劉郎前度看桃花如今老

前調己巳二月二十二日遊北門有感

試檢春光都不在槿籬茅屋荒城外
枯眠衰草鴉啼枯木黃染菜花無意緒
青描柳葉渾粗俗憶繁華不似少年遊傷心目
棠隴錦梨園玉燕衣舞鶯簧曲豔陽天
輪與午橋金谷行處綺羅香不斷
歸時絃管聲相逐怕夕陽飲散近黃昏
燒銀燭

減字木蘭花慢滕王閣

九皋明月夜跨一鶴赴仙都聽佩玉鏘鳴驂鸞小住高閣凭虛萋
萋草生南浦興未闌歸去東吳笑指尊前二客昨宵良會非歟
莊周蝴蝶雨遽如變化一華胥歎物換星移壺中日月鏡裏頭顱
芳洲獨醒人在采芙蓉歲晏孰華予欲汎蘭舟容與煙沙漠漠重
湖

前調和心困
春雪調

怪東風太早未鐙夕放瓊花是何處瑤姬來看玉樹光彩交加堊
人但知三白喜新年天意薦休嘉肯念兵屯北塞誰上表賀南衙
西斜日影簷牙又被黑雲遮歎病骨支離別懷蕭索空負年華
鼇山已成春夢歸去來空谷臥煙霞卻笑昌黎才子浪吟逐馬隨
車

念奴嬌

茂林修竹自山陰散後幾番陳迹修禊年年春故事懊恨風流非
昔當日蘭臺後來菊圃苗裔江南北覩君雅號恍然舊事重憶

歲晚木落天寒黑貂將敝尙作新豐客星斗胸中空燦爛磨蝎空
名何益袁呂相逢知音一笑肉眼無人識訪予梅屋談天聊慰孤
寂

醉江月贈王道人性
初歸茅山

芙蓉城郭有羽仙騎鶴來從何處曾拉茅君峰頂會瑤佩隨風吹
去玉笈偷開青囊拾得笑看人間世藏身壺裏箇中別有天地
共約手種蟠桃綴花結實已是三千歲欲膾長鯨麟作脯倒海聊
供一醉偶憶寒梅更慚小草拂袖懷歸計蓬萊清淺雲帆他日相
遇

前調送幕
職

殘花賸柳正啼鶉聲裏郵亭別館三疊陽關聽未徹手執離杯引
滿政坐諸君久煩老子今日纔蕭散翩然歸去故園綠樹春晚
人世蒼白浮雲自舒自卷不入高人眼官事如麻何日了輪與閒
中不管翠柏臺高紫薇省近別有清華選功名歲晏江城回首天

遠

前調洛陽耆英會二首

戴花劉監算耆英會上與吾同歲伊洛山川今如古人事幾番興
廢夢枕初殘黃梁未熟已換人間世簞瓢鐘鼎看來一等滋味
天上赤白雙丸東來西往出沒真兒戲惟有神仙長年訣長似功
名富貴欲擣玄霜難尋玉杵何日藍橋遇裴郎老矣雲英那肯隨
去

延年有術殮古松根下扶苓千歲縱是延年如何益命也道之將
廢思古之人詞章節行杲杲行當世遺風流韻淵然尚有餘味
無奈先哲凋零後生坦率多以儒為戲每笑唐人書不讀直把黃
金買貴山澤奇才雲林真隱沒齒何曾遇人生如夢江流日夜東
去

水龍吟次藥房韻

西州玉局飛僊霓裳會侍槐龍翠飛花麗句雅音猶在有人賡未

千載峩峰一江川練又鍊清氣歎瀛洲路近剛風吹斷謾自有凌
霄意 草碧寒窗靜裏折瓊枝小闌同倚新吟婉美西施態度慵
本脫梳洗按羽調絲雪兒薄相為君心醉恨高樓暮隔江城花暗
碧雲遙睇

前調附史藥房作并序

清明後淡日過子方小飲簾櫳靚深綠陰晝寂闌邊玉茶正花
香韻蕭遠主人出侍人彈琵琶侑觴酒未終上馬徑去恍然
藍橋湓浦之遇也賦水龍吟以記其事呈子方一笑

等閒過了清明草痕深一庭新翠光風信息牡丹初褪茶醪猶
未燕語清圓梅英鬆潤困人天氣笑文園倦客詩才減盡猶有
傷春意 別有留春去裏小房櫳玉英雙倚天香浮動銖衣乍
試鉛華盡洗一曲琵琶輕攏挑撥未觴先醉又恩恩上馬藍橋
路隔謾增凝睇

前調再次韻一首寄藥房

燕芹香老春深微風颭動新篁翠驚敲夢斷忙呼小玉故人來未
香縷篩簾游絲墮几暖薰花氣問春隨鶯到又隨燕去誰解得東
君意 澗水流紅影裏小樓東有人孤倚殘桃著雨鬢容撩亂未
堪妝洗冉冉年光悠悠時事不如沈醉更韋娘一曲司空慣見也
應回睇

探春慢

和心淵已元夕韻

細草黏冰疏林補雪衰翁未覺春暖曝背低簷燎衣破竈誰識舞
臺歌館樂事如今懶謝鄰伴東招西喚何消看試華鐙月光今夕
圓滿 念昔繁華帝里侍鳳輦夜遊棚曉人散逐鼓方催韻簫正
美忽被西風吹斷簌簌梅花落忍聽得一聲羌管懷古傷情淚痕
溼春衫短

沁園春

送李同知之官鄴都

東西二都史載循良不五六人記南陽有召潁川有霸并州如郭
河內如恂直比朱絃清倅古鏡吏自秋霜民自春如公者守廉平

二字近古名臣

棠陰手種方新又五馬翩翩鄴水濱想臺高銅

雀尙畱遺迹堂深畫錦空鎖凝塵琴瑟從容雅歌緩帶美政遙知

達紫宸期年後看快行宣召班冠廷紳

前調

送楊伯可

雨足江皋月滿中秋使客將歸看扁舟空載貧無長物破囊收貯
富有新詩清白傳家懷金不受潔己從來畏四知民何幸盡相安
南里樂業熙熙 誰知經界良規是三代相傳古法遺要講明有
素施行不擾寬嚴相濟表裏無私慚愧偏州久淹老子卻怪朝家
選用遲公今去定致身鴈序接武龍墀

金縷曲

代送同僚

乍到蓉城路聽兒童歌謠德政感恩如父好入西京循吏傳誰道
今人非古畱遺愛甘棠佳樹節操冰霜清凜凜看和風吹作陽春
雨程去速遽如許 我來不見空懷竚望彼美碧雲暮合草萋南
浦信是有才供世用敢擇東西何處又誰念嬰兒思乳不恨使君

吾不識恨使君不與吾相輔聊寄意短長句

牆東類彙卷二十

牆東類彙補遺
張可久去思碑頌

侯心如水不受私謁節朔歲時慶饋不通是其清也案牘如山剖
決如流廷無畱訟獄無淹囚是其明也事有不可署不下筆議如
聚訟惟是之從是其公也撓之弗濁犯之不校同寅協恭不失顏
色是其和也旱乾水溢勸分賑急躬履阡陌寢食弗遑是其惠也
頌曰西京循吏傳止七人曷艱其選艱得其循漢有生祠未立銘
碣唐碑遺愛始自仁傑猗嗟張侯爲政廉平旣去而思媲美懷英
流水城南龜趺在軒匪佞于侯士有公言

李復初去思碑

范陽李侯之尹澄川也有五善焉約己清苦一也禮敬儒先二也
勤恤民隱三也沮斥豪強四也期令信必五也始興起學宮延聘
經師泥行卻葢救水潦之災露宿停車除螟蝗之害橫閭里者必
治擾官府者必詰兩造在庭片言可折私謁及門一介不取法不

曲于己之所親令必伸于人之所憚若此類者不可勝紀皆五善之實也致和閒鹽官海濫行省調諸郡夫修築石隄賦以尋丈侯帥所部晨夜督役以身先之期未半而工畢輒不俟報引眾而歸他郡淹延日久百姓苦之侯歸將及郭見有木筏萬計橫于官塘者阻客舟不行問其主權貴人也侯曰在法有禁命所在拘留之權貴人所遣卒無賴於廣會上極口詆侯坐皆走避侯弗爲動當路者轉行請託亦弗從其臨事如此或謂侯於同列專而不和其恢廓自信勇往直前遇事不能屈摺致與物忤非不和也又謂侯嚴而少恩然其剛腸嫉惡取怨尤而不悔其人能改卽止亦不念舊非少恩也昔少卿胡元禮欲殺一囚司丞李日知以爲不可往復數四元禮曰吾不離刑曹此囚終無死法君子以爲嚴元禮雖不及日知之恕其事曲直今無可攷要亦各執所見未必持私心也昔郭晞在汾縱卒爲暴段秀實梟卒之首一軍盡甲秀實往讓晞曰副元帥勦塞天地當

念始終今亂且敗郭氏晞再拜叱亂卒散歸失伍敢譁者死君子以爲秀實之勇雖不可奪而晞之服善改過使一軍盡遵紀律亦不可少也嗚呼使古人之所行今人能行之則皆無愧于古人矣人之情好人之同己而惡人之異己好惡之不齊久矣任事者怨之府疑似者謗之階此老氏之所以不敢爲天下先而市中之虎卒取證於三人也然而人眾勝天天定亦能勝人公論之昭昭終不可誣也昔子貢問鄉人之好惡于仲尼曰不如鄉人之善者好之不善者惡之朱子從而釋之曰善者好之而惡者不惡則必其有苟合之行惡者惡之而善者不好則必其無可好之實今李侯之於州人也可謂善者好之而惡者惡之矣然而惡之者寡好之者眾侯之所以爲賢也於此見一州之人善多而惡者少也於此見李侯之善果可書也乃爲銘曰侃侃李侯直大而方仁不茹柔勇不吐剛姁姁扶弱矯矯抑強易頑而廉化暴而良令行三載愛畱一邦穹碑在道見者心降謂言弗信有如長江

俞時齋墓志銘

字仲山

語云貧無怨難富無驕易貧與富似指二人在聖門中其一人似原憲一人似端木賜軒車不容巷固不如蓬戶桑樞之樂也然未有先富後貧無驕無怨賜與憲合爲一人如吾里中俞君仲山之賢者君諱奕曾其先河間人有諱稠者五代之季奔南唐仕至節度使孫獻卿登宋咸平進士第歷官吏部尙書始遷于歙建炎後徙暨之鳳戈鄉悟空鎮力田治生家饒財宗族繁衍余先外氏寶章公居鎮上余總州往來其間及見君門戶昌盛時積穀如墉散金如土輿臺阜隸日仰給門下者數千指治亭榭輦花石四時娛宴簫鼓不絕聲君獨被服儒者折節交當世名士壯年氣鋒銳期功業可唾掌取穹窿之基勢極而圯乙亥丙子江浙亂鎮邑爲墟寇掠所至器用無孑遺君昆弟逋竄返則無歸里人皆來唁君君夷然一不屑意改築環堵之室於故居之西偏四旁盡爲瓦礫壤垣荆蒿沒人長君嘯詠其側若富貴無素者一榻容膝焚香默坐

簞瓢屢空日宴忘飢妻子望之而拊心君汨如也尤喜異書見輒收之架籤甚富校讐不倦杜門卻掃四十餘年不到城府貴人莫能窺其面年益高性益簡伉殆若與世絕者不喜酒樂佳會招之率不往間從野老泥飲田間幅巾藜杖竟日從容與人無恩怨自奉甚薄纖毫不以干人獨教子嚴甚寒暑不輟子遠字紹堂淳愿端慤左右奉養無違時從余游學書績文籍籍有聲名所以隱居屏事得行其志者有子也夫君晚苦氣痞病日侵精爽而臥起如平時治命纖悉既具其家人環泣徐張目曰貧富命也死生亦命也吾達之矣作兒女哭何益斂葬稱家之有無慎不用緇黃法易簣前三日顧其倩惠經曰城東陸叟吾友也得志吾墓無憾矣汝以吾命往宜得請及吾目未瞑也尚克知之余泣拜曰諾既訖至來速銘余歎曰君達知者奚以文爲雖然死者有知吾不食言謹按君世次曾祖諱文宥故軍學諭祖諱延珪故迪功郎父諱光發故漕貢進士母包氏君號時齋終身不仕至元中縣學諸生迎致

爲師輒棄去君生宋淳祐十一年辛亥之五月以至治元年辛酉
之二月卒享年七十有一娶奚氏子男二人遠奚出次莒其出微
女二人長適湯某次適惠經寶章公之孫也孫男一人樵女二明
遠等卜以二月之某日葬君於鄧陽之原從先生兆也銘曰植木
榮枯譬人之生春不能凋秋亦弗萌達者不違與時偕行噫時耶
命耶何氣之屯節之亨耶

天慶觀丹樓詩

丹樓獨倚對青山歷歷西風十二鬢曉氣淨連紅樹碧秋雲低護
石苔斑仙人長嘯聞天外羽士吹笙帶月閒安得置身蕭爽地捲
簾時待鶴飛還

天壽觀載夢舟詩

中流一葉下寰瀛偃息猶便鶴骨清渾沌未分龍伯國江山長繞
化人城帆開細雨迷春蜨棹拂涼波動石鯨回首天池三萬里臥
遊何惜片時程

梅花別墅繆苔石先生清玩行吟處道經有感口占一首

一簪華髮老江陰伏闕上書無此心門外落紅春寂寂室中虛白
晝沈沈瓦甌竹葉巢雲醉山墅梅花榻雪尋人海黃塵深十丈此
閒那得半毫侵

牆東類彙一書據黃志云僅存三十六篇稱爲脫簡蓋在明
初久已散失不獲全本以此知畱心掌故者少也我朝昇
平日久嗜古者多凡從前不恆見之書盡壽梨棗此書初從
永樂大典鈔出始得徧傳宇內惟傳寫旣多魚豕之譌篇中
多有茲悉心讐校又補其闕文一卷付梓雖非原本而墜緒
得延未始非徵文者所共寶也至於文章評論元史及邑志
已詳無煩更述道光十九年歲次己亥孟冬族裔煒謹識於
世德堂

牆東類彙補遺

元史儒林傳

陸文圭字子方江陰人幼而穎悟讀書過目成誦終身不忘博通經史百家及天文地理律曆醫藥算數之學宋咸淳初文圭年十八以春秋中鄉選宋亡隱居城東學者稱之曰牆東先生延祐設科有司強之就試凡一再中鄉舉文圭爲文融會經傳縱橫變化莫測其涯際東南學者皆宗師之朝廷數遣使馳幣聘之以老疾不果行卒年八十五文圭爲人剛明超邁以奇氣自負於地理考覈甚詳凡天下郡縣沿革人物土產悉能默記如指諸掌先屬續一日語門人曰以數考之吾州二十年後必有兵變慘於五代建炎吾死當葬不食之地勿封勿樹使人不知吾墓庶無暴骨之患其後江陰之亂冢墓盡發人乃服其先知有牆東類彙二十卷文圭以宋咸淳九年領鄉薦後入元延祐四年七年兩舉傳內稱一再中鄉舉以此元試不拘額有再試三試蓋爲進士不得則復試云

牆東類彙校勘記

吾邑元時陸子方牆東類彙二十卷 四庫提要稱其為元初
衰然一作者道光己亥李申耆先生借鈔文瀾閣所藏永樂大
典中蒐輯之本俾陸清臣梓之庚申亂後傳本希有余前在粵
中赤溪任所擬重刻之校勘舊刻譌舛處數十條適奉諱未獲
重鈔因將校勘各條先記於此異日能償此願與否未可知也
光緒癸巳正月金武祥識

卷一

第三葉上

自當時王道脩明至不學則失之凡七行此數行雜語

錄氣與通篇不類疑是小注編永樂大典者誤鈔作正
文也 篇末上一章是个不息字二語亦然新刻第二

第十葉上

昭賁火之神明神明疑當作文明觀下篇仰昭代之文

明可見 鹿鳴之三疑當作鳴鹿之三方可對上句嘉
魚之什 第七葉上

卷二

第一葉下 髮亦種種亦字重下句疑有誤

第四葉上 新婦雖處於爾姑雖處疑當作難處爾姑疑當作兩姑

下靡不有初鮮克有終口早自圖可以無辱 第三葉上

第七葉下 徒勞夢寢疑當作夢寐 第五葉下

第十葉下 頗衰老子衰疑當作哀頗衰老子見後漢書馬援傳成

句也 第八葉上

第十六葉上 幽女同歸正值九月授衣之候幽當作幽 第十一葉下

卷三

第二十葉上 亂我者太子也我字下脫家字 第八葉下

卷四

第二葉下 卮貌蠟言卮當作柅 第二葉上

第四葉下 三壤成賦而稭秸粟米供於甸服之中稭當依禹貢作

銓 第三葉下

第九葉下 何必受人之牛羊必疑當作異下文何異扼飢者之吭

句法正同可推而知也 第七葉上

卷五

第十八葉上 于時歷揚中外歷揚當作敷歷 第十二葉下

卷六

第六葉上 泊焉而取俗諧也泊當作汨 第四葉下

第十葉下 不奉法者不字疑在字或而字之誤 第八葉下

第十二葉上 送陳君仲謙回長興州序文程君吉甫有子仲謙陳程

二字必有一誤 第十四葉上

第二葉下 為第一議議疑當作義 第十五葉下

第三葉下 而名陽古木日就槁摧名當作夕 第十六葉下

卷八

第四葉下 彼伏波擊交趾彼字疑當作後字 第三葉下

第十二葉下 笑巖雖為其學幹略勤敏其學二字疑倒 第九葉上

第十葉下 瀾立巖石之下立字疑有誤 第十葉上
第十一葉下 儒者則合為從道疑有誤或合字當作曷 第十二葉下
第十二葉上 又何力致之耶何疑當作可 第十五葉上

卷九

第六葉上 畏遣而懼罪者遣疑當作譴 第四葉下
第九葉下 落筆輒不忘凡忘字疑衍 第六葉下
第十葉下 豈敢如子產之面乎敢字疑 第七葉下
第十一葉上 刪前三百篇前字疑 第八葉上
第十二葉上 其友固不識耶似用豫讓事然耶字可疑 第八葉下

卷十

第二葉上 西川看競度度疑當作渡 第二葉上
第七葉上 前輩謂不可觀人觀人下疑脫家書二字 第五葉上
第十一葉下 凝水焦火水疑當作冰 第八葉下

卷十一

第四葉上 與和李瑞卿與和二字疑有誤 第三葉上
第十葉上 聞北方有醜醜老老字疑當作者 第七葉上

卷十二

第五葉上 雍管議創屯田雍疑當作邕雍邕古通然邕管地名諸
書無作雍者以與雍州溷也 第三葉下
第六葉上 公出私帑募工四十人募當作募 第四葉下
第一葉上 浮光為極邊浮字疑誤 淮西路鈴鈴疑當作鈴 皆十
上

卷十三

第二葉下 江西二十八省省字疑 第一葉下
第七葉下 鳳皇鏘鏘眉於齊姜眉當作育 第五葉下
第九葉上 善地里者里當作理 第六葉下
第十葉下 稿死牖下稿當作稿 第十葉下
第十一葉下 塘石未具塘疑當作壙 第十二葉上

第九葉上 向心報國向字疑 第十三葉下

卷十四

第一葉上 幽居被圍幽字疑

第四葉上 監慶元鮪琦鎮鮪琦當作鮪琦鮪琦見漢書地理志 第三葉上

第八葉下 應充里正主首首疑當作者 第六葉上

第十葉上 扁虛束手虛當作盧 第八葉上

第十二葉下 易華皖于正寢皖當作皖見禮記檀弓 第九葉上

第十三葉上 挽古道以自期挽字亦恐誤 同上

第十四葉上 知閻公之得婚婚疑當作壻 第十葉上

卷十五

第四葉下 作者敦竊比敦疑當作敢 第三葉下

第十葉下 牖不死伯牛不當作下 第八葉下

第十五葉下 茗枝伏燕鵲疑當作雀 淳風日已薄一首中有李

侯今之人語與題不相應 題是送陸同知恐是另送一人失其原題誤列前首之後且前首長此首短體格亦不同 第十

第八葉上 客行困弔苦苦當作古 下 苦甚不致醉鶚食子何心鶚

當作鶚 第十三葉下

第十葉下 出位獨難咤難疑當作歎 第十五葉上

第十四葉下 莫壓鳥雀喧壓疑當作厭 蕭蕭黃素葉素字疑 第十

第十五葉上 仙人來賢聖來當作未係用昌黎詩 下 秋渚蘆瀟瀟瀟

瀟當作蕭蕭 下 銀燭瀉高簷燭當作竹見太白詩 下 盤

水走低昂水疑當作珠 第一條十七葉下以下三條十

卷十六

第十葉下 子京承敘老友白首鶯雁陪風流敘當作叔雁當作

燕 第七葉下

第十葉下 身被紅綃帝握濃握疑當作渥 第八葉下

第十一葉上 誤長清談室致患室疑宜字或空字之譌 第十三葉上

第十二葉上 玉人慘淡何人筆玉人疑當作玉花 第十三葉下

卷十七

第一葉下 邀渴夜相迎渴字疑有誤 第一葉上

第三葉上 那當老病生生當作身方叶韻 第二葉下

卷十八

第五葉上 中秋見梅詩注成幽香香當作昏 第四葉上

第九葉上 官民乘訪皆公論乘當作采 第七葉下

第十葉上 閑戶柴車久不巾閑當作閉 第十葉上

第十一葉上 置酒清和反怒章和疑當作河 第十一葉上

卷十九

第二葉上 圍圍方是樂是疑當作自 第一葉下

第三葉下 當時以意摸寫摸當作摹 第二葉下

第六葉下 醉呼楊盧主文盟盧當作陸謂楊誠齋陸放翁也 第五葉上

卷二十

第三葉上 白頭又欲輕桐背桐疑當作相 虎頭未可輕搖筆搖

疑作投 第二葉下

第五葉上 莫將衣翰誇餘子衣疑當作文 第四葉上

第七葉下 喜客泉詩注廣東廉泉廉當作貪 第六葉上

第八葉下 劉澹齋求米舫下疑脫詩字 第七葉上

第九葉上 晚無書畫真無益晚無疑當作晚耽 誰是錦里秋風

客是疑當作知 第七葉上下

第十葉上 歸去東吳去字下疑闕一字此句當五字 日影簷牙

影字下疑闕一字此句當七字 第十二葉下

第十一葉下 縱是延年如何益如疑當作知 第十三葉下

第十二葉上 又鍊清氣鍊字疑誤此字當用平聲 猶有傷春意猶

字下疑脫自字此句當用六字 第十四葉上

牆東類彙校勘記

右牆東類稿二十卷元陸文圭撰文圭字子方江陰人宋咸淳以
 春秋中鄉選延祐設科再中鄉舉事蹟具元史儒林傳是集二十
 卷久已失傳館臣從大典中搜得遺文三百餘篇詩詞六百餘篇
 仍釐為二十卷道光己亥陸氏後人清臣承陽湖李申耆先生之
 指從 文瀾閣鈔出刊於江陰兵燹後板亦殘缺爰就印本重刊
 金君淮生新讀是集成校勘記一卷附刊於後至清臣補遺詩文
 六篇不注所出亦一病也光緒丙申小除夕武進盛宣懷跋

Blank manuscript page with vertical lines.



